

EPIGRAMMA.

TA CLARISSIMI, DISERTISSIMI QVE VI-

RI THOMAE MORI BRITAN-

NI, PLERAQVE E GRAE-

CIS VERSA.



EREOR illustrissime princeps, dum more uirginum,
quæ satis formæ suæ non si-
dūt, picturæ lenocinio gra-
tiam illepidis uersiculis co-
parare studeo, ne eos qua
maxime dote placere potu-
issent, id est ipsius rei noui-
tate, fraudarim. Nam quā
ilico in præsentem coronationem tuam conscriptos eos
pictori exornādos dedissem, effect certe podagra, qua
protinus quām opus inchoauit, incōmodissime tētatus
est, ut eos nunc tandem, serius aliquanto quām res po-
stulare uidebatur, exhibeam. Itaq; (si tecum pro insita
humanitate tua liberius agi sinis) haud scio, maiorem
ne gratiā uersiculis nostris pictoris manus adiecerint.
an pedes ademerint. Quippe quibus effectum est, ut
mihi uerendum sit, ne nō minus sera, ac proinde intem-
pestiva uideri tibi possit hæc nostra gratulatio, quām
olim

ilico in præsentem coronationem tuam conscriptos eos
pictori exornādos dedissem, effect certe podagra, qua
protinus quām opus inchoauit, incōmodissime tētatus
est, ut eos nunc tandem, serius aliquanto quām res po-
stulare uidebatur, exhibeam. Itaq; (si tecum pro insita
humanitate tua liberius agi sinis) haud scio, maiorem
ne gratiā uersiculis nostris pictoris manus adiecerint.
an pedes ademerint. Quippe quibus effectum est, ut
mihi uerendum sit, ne nō minus sera, ac proinde intem-
pestiva uideri tibi possit hæc nostra gratulatio, quām
olim

olim Tiberio principi uisa est, Iliensium illa consolatio,
 qua eum de morte filij, iamdiu defuncti, consolabatur.
 quam ille faceta dicacitate delusit, respondens se eo
 rum quoq; uicem dolere, quod bonum militem amisis-
 sent Hectorem, uerum eorum officium, ad luctum nō
 senescentem modo, sed planè præmortuum, non po-
 tut esse non ridiculum, meum uero ab hoc uitio uendi-
 cat immēsa illa de celebri coronatione tua lātitia. quæ
 quum pectoribus omniū tam efficacem sui uim ac præ-
 sentiam impresserit, ut senescere uel integra ætate non
 possit, effecit nimirum, ut hoc meum officium non sero
 re peracta atq; euania, sed præsens in rem præsentem
 peruenisse uideatur. Vale princeps illustrissime, & (qui
 nouus, ac rarus regum titulus est) amatissime.

IN VSCEPTI

DIADEMATIS DIEM HENRICI OCTAVI,
 ILLVSTRISSIMI AC FAVSTISSIMI BRI-
 TANNIARVM REGIS, AC CATHERI-
 NAE REGINAE EIVS FELICIS-
 SIMAE, THOMAE MORI
 LONDONIENSIS CAR-
 MEN GRATVLATORIVM.



I qua dies unq; si quod fuit Anglia tēpus,
 Gratia quo superis esset agenda tibi.
 z Hæc est

Hæc est illa dies niueo signanda lapillo,
Læta dies fastis annumeranda tuis.
Meta hæc seruitij est, hæc libertatis origo,
Tristitiae finis, lætitiae caput.
Nam iuuenem sæcli decus o memorabile nostri
Vngit, & in regem præficit ista tuum.
Regem qui populi non unius usq; sed orbis
Imperio dignus totius unus erat.
Regem qui cunctis lachrymas detergat ocellis,
Gaudia pro longo substituat gemitu.
Omnia discussis arrident pectora curis,
Ut solet excussa nube nitere dies.
Iam populus uultu liber præcurrit ameno,
Iam uix lætitiam concipit ipse suam.
Gaudet, ouat, gestit, tali sibi rege triumphat,
Nec quicquam nisi rex quolibet ore sonat.
Nobilitas, uulgus iam dudum obnoxia feci,
Nobilitas, nimium nomen inane diu,
Nunc caput attollit, nunc tali rege triumphat,
Et merito causas unde triumphet, habet.
Mercator uarijs deterritus ante tributis,
Nunc maris insuetas puppe resulcat aquas.
Leges inualidæ prius, imo nocere coactæ.
Nunc uires gaudent obtinuisse suas.
Congaudent omnes pariter, pariterq; rependunt
Omnes uenturo damna priora bono.

Iam

Iam quas abdiderat cæcis timor ante latebris,

Promere quisq; suas gaudet & audet opes;

Iam iuuat o, potuit tot furum si qua tot uncas

Tam circumspectas fallere præda manus.

Non iam diuitias ullum est (magnum esse solebat)

Quæsitas nullo crimen habere dolo.

Non metus occultos insibilat aure susurros,

Nemo quod taceat, quod uie susurret, habet.

Iam delatores uolupē est contemnere, nemo

Deferrī, nisi qui detulit ante, timet.

Conueniunt igitur simul ætas, sexus, & ordo,

Causaç; non ullum continet ulla domi.

Quo minus intersint, dum sacrī rite peractis,

Rex init auspicijs regna Britanna bonis.

Quacunq; ingreditur, studio conferta uidendi

Vix sinit angustam turba patere uiām.

Opplenturç; domus, & pondere tecta laborant.

Tollitur affectu clamor ubiq; nouo.

Nec semel est uidisse satis, loca plurima mutant,

Si qua rursus eum parte uidere queant.

Terpectare iuuat, quid ni hunc spectare iuuaret,

Quo natura nihil finxit amabilius?

Mille inter comites excelsior omnibus extat,

Et dignum augusto corpore robur habet.

Nec minus ille manu est agilis, quam pectore fortis,

Seu res districto debeat ense geri.

Seu quum protentis aude concurritur hastis,
Seu petat oppositum missa sagitta locum.

Ignea uis oculis, Venus insidet ore, genicèz
Est color, in geminis qui solet esse rosis.

Illa quidem facies alacri ueneranda uigore
Esse potest teneræ uirginis, esse uiri.

Talis erat, Nympham quū se simulauit Achilles.
Talis, ubi Aemonijs Hectora traxit equis.

O si animi præstans unà cum corpore uirtus.
Cerni, natura non prohibente, queat.

Imo etiam uultu uirtus pellucet ab ipso,
Est facies animi nuncia aperta boni.

Quàm matura graui sedeat prudentia mente,
Quàm non solliciti pectoris alta quies,

Quocèz modo sortem ferat, & moderetur utrancq;
Quanta uerecundæ cura pudicitiae,

Quàm tranquilla souet placidum clementia pectus,
Quàm procul ex illo fastus abest animo,

Principis egregius nostri (quas fingere non est)
Præ se fert certas uultus & ipse notas.

At qua iustitia est, regnandi quas habet artes,
Prosequitur populum qua pietate suum,

Hæc facile ex uultu fiunt illustria nostro,
Hæc sunt ex nostris conspicienda bonis.

Quod sic afficimur, quod libertate potimur,
Quodcèz abierte timor, damna, pericla, dolor.

Quod

Quod rediere simul, pax, commoda, gaudia, risus,

Eximij virtus principis inde patet.

Eneruare bonas immensa licentia mentes,

Idq; etiam in magnis assolet ingenij.

At quamuis erat ante pius, mores tamen illi

Imperium dignos attulit imperio.

Nam bona quæ pauci sera fecere senecta,

Protinus in primo præsttit ille die.

Illico correptos inclusit carcere, quisquis

Consilio regnum læserat ante malo.

Qui delator erat, uincis constringitur arctis,

Vt mala quæ multis fecerat, ipse ferat.

Ad mercatores aperit mare. si quod ab illis

Durius exactum est ante, remisit onus.

Despectusq; diu magnatum nobilis ordo,

Obtinuit primo pristina iura die.

Ille magistratus & munera publica, uendi

Quæ sueuere malis, donat habenda bonis.

Et uersis rerum uicibus feliciter, ante

Quæ tulit indoctus præmia, doctus habet.

Legibus antiquam (nam uersæ euertere regnum

Debuerant) subito uimq; decusq; dedit.

Omnis cumq; prius prorsus descisceret ordo,

Protinus est omnis redditus ordo sibi.

Quid quod in his etiam uoluit rescindere quædam,

Vt populo possit commodus esse suo.

Quæ tamen ante suo nouit placuisse parentis?

Sic patriam, ut decuit, prætulit ille patri.

Nec miror. quid enim non principe fiat ab illo,

Cui cultum ingenuis artibus ingenium est?

Castalio quem fonte nouem lauere sorores,

Imbuit & monitis Philosophia suis.

Nominibus populus multis obnoxius omnis

Regi erat. hoc unum pertimuitq; malum.

At rex, hinc metui quum posset, posset & inde

Congerere immensas, si uoluisset, opes.

Omnibus ignouit. securos reddidit omnes.

Sollicitiq; malum substulit omne metus.

Ergo alios populū reges timuere, sed istum,

Per quem nunc nihil est quod timeatur, amant.

Hostibus o princeps multum metuende superbis.

O populo princeps non metuende tuo.

Illi te metuunt. nos te ueneramus, amamus.

Illis, noster erit, cur metuaris, amor.

Sic te securum, demptoq; satellite tutum,

Vndiq; præstabunt, hinc amor, inde timor.

Extera bella quidem, coëat si Gallia Scotis,

Sit tantum concors Anglia, nemo timet.

At procul intestina aberunt certamina. namq;

Semina, quas causas unde oriantur, habent:

Primum equidem de iure tuae tituloq; coronæ

Quæstio iam non est ulla, nec esse potest.

Quæ

Quæ certare solet iam tu pars utraq; solus.

Nobilis hanc litem soluit uterq; parens.

Ast magis abs te etiam est populi procul ira, tumultus

Impia ciuilis quæ solet esse caput.

Ciuibus ipse tuis tam charus es omnibus unus,

Vt nemo possit charior esse sibi.

Quod si forte duces committeret ira potentes,

Soluetur nutu protinus illa tuo.

Tanta tibi est maiestatis reuerentia sacræ,

Virtutes merito quam peperere tuæ.

Quæ tibi sunt, fuerant patrum quæcunq; tuorum,

Sæcula prisca quibus nil habuere prius.

Est tibi namq; tui princeps prudentia patris.

Estç tibi matris dextra benigna tuæ.

Est tibi mens auiæ, mens religiosa paternæ.

Est tibi materni nobile pectus aui.

Quid mirum ergo, nouo si gaudeat Anglia more,

Cum qualis nunquam rexerat ante, regat;

Quid quod lætitia hæc, quæ uisa est non potuisse

Crescere, coniugio creuit adaucta tuo;

Coniugio, superi quod decreuere benigni,

Quo tibi, quoq; tuis consuluere bene.

Illa tibi coniunx, lætus communia tecum

Quam uidit populus sceptræ tenere tuus,

Cuius habent tantam cælestia numina curam,

Vt thalamis ornent, nobilitentç tuis.

Illa est

Illa est, quæ præscas uincat pietate Sabinas.
Maiestate sacras uicerit heroïdas.

Illa uel Acestes castos æquarit amores,
Vel prompto superet consilio Tanaquil.

Illo ore, hoc uultu, forma est spectabilis illa,
Quæ talem ac tantam sola decere potest.

Eloquio fœcunda cui Cornelia cedat,
Inq[ui]p[er] maritali Penelopeia fide.

Illa tibi princeps multos deuota per annos,
Sola tui longa mansit amore mora.

Non illam germana soror, nec patria flexit,
Non potuit mater, non reuocare pater.

Vnum te matri, te prætulit illa sorori.
Te patriæ, & charo prætulit illa patri.

Illa tibi felix populos, hinc & inde potentes
Non dissoluenda iunxit amicitia.

Regibus orta quidem magnis, nihiloq[ue] minorum est
Regum, quam quibus est orta, futura parens.

Hactenus una tui nauem tenet ancora regni,
Vna, sat illa quidem firma, sed una tamen.

At regina tibi sexu fœcunda uirili
Vndiq[ue] firmatam perpetuaq[ue] dabit.

Proueniunt illi magna ex te commoda, rursus
Ex illa uenient commoda magna tibi.

Non alia ulla fuit certe te digna marito.
Illa non aliud coniuge dignus erat.

Anglia

Anglia thura feras, sacrumq; potentius omni
Thure, bonas mentes innocuasq; manus.
Connubium ut superi hoc, sicuti fecere, secudent,
Vt data cælesti sceptra regantur ope.
Vtq; ipsis gestata diu hæc diademata, tandem
Et natus nati gestet & inde nepos.

EIVSDEM, IN SVBITVM IMBREM, QVI
IN POMPA REGIS AC REGINAE
LARGE OBORTVS, NEC SO-
LEM ABSTVLIT, NEC
DVRAVIT.

Dum peterent sacras rex & regina coronas,
Pompa qua nunquam pulchrior ulla fuit:
Aureus explicuit late se Phœbus, eratq;
Leta dies populi consona pectoribus.
At ubi iam medium celebris peruenit in urbem,
Tota statim æthereis pompa rigatur aquis.
Nulla tamen Phœbi subduxit lumina nubes,
Et minima nimbus perstetit ille mora.
Res bene contra æstus cecidit, rem siue quis ipsam
Spectet, siue omen, non potuit melius.
Principibus nostris uberrima tempora spondent,
Et Phœbus radijs, & Louis uxor aquis.

EIVSDEM AD REGEM.
Cuncta Plato cecinit tempus quæ proferat ullum,
Sæpe fuisse olim, sæpe aliquando fore.

A Ver fugit,

Ver fugit ut celeri, celeriç reuertitur anno,
 Bruma pari ut spacio quæ fuit ante, redit.
 Sic inquit rapidi post longa uolumina cœli
 Cuncta per innumeræ sunt redditura uices,
 Aurea prima sata est ætas, argentea post hanc.
 Aerea post illam, ferrea nuper erat.
 Aurea te princeps redierunt principe sæcla.
 O possit uates hactenus esse Plato.

EIVSDEM AD REGEM DE SPECTACV
 LIS EQVESTRIBVS PER EVM
 AEDITIS, EPODON
 IAMBICVM.

Quæcunq; reges ædiderunt hactenus
 Equestrium spectacula,

Lugubris illa semper aliqua reddidit
 Calamitas insignia.

Aut tabido transuerberati militis
 Madens harena sanguine.

Aut lanceis ista ungulisiæ sonipedum
 Obtrita plebs ferocium,

Turbañ ue comprimens simul miserrimam
 Lapsæ ruina machinæ.

Verum tua haec spectacula o rex omnium
 Quæ uidimus pulcherrima,
 Non ulla clades, sed tua digna indole
 Insignit innocentia.

Signum A

Eiusdem

EIVSDEM, DE VTRAQUE ROSA
IN VNVM COALITA.

Purpureæ uicina fuit rosa candida. utrancq;

Vtraq; dum certant, sit prior utra, premit,

Vtraq; sed florem rosa iam coalevit in unum,

Quoq; potest uno lis cadit illa modo.

Nunc rosa consurgit, nunc pullulat una. sed omneis

Vna habet hæc dotes, quas habuere duæ.

Scilicet huic uni species, decor, atq; uenustas,

Et color, & uirtus, est utriuscq; rosæ.

Alterutram ergo rosam uel solam quisquis amauit,

Hanc in qua nunc est, quicquid amauit, amet.

At qui tam ferus est, ut non amet, ille timebit.

Nempe etiam spinas flos habet iste suas.

IN RHETOREM INDOCTVM.

È GRAECO.

Quinq; Solœcismis donavi Rhetora Flacchum,

Quinq; statim decies reddidit ille mihi.

Nunc numero hos, inquit, paucos contentus habeto,

Mensura accipies quando redibo Cypro.

IN SUSPICIONEM. È GRAECO.

Magnā habet in rebus uim ac pondus, opinio. non uis

Lædere, uelle tamen si uideare, peris.

Sic & Philolaum quondam occidere Cretenses,

Quem falso credunt uelle tyrannum agere,

A 2 In rhetorē

IN RHETOREM INFANTEM SCITE
PICTVM. E GRAECO.

Ipse tacet Sextus, Sexti meditatur imago.

Ipsa est rhetor imago, ab imagine rhetor imago est.

IN CAECVM ET CLAVDVM MENDICOS.

Claudipedem gestat cæcis uicinus ocellis,

Conducitq; oculos arte, locatq; pedes.

ALITER.

Cæcus claudipedem gestat, prudenter uterq;

Rem gerit. atq; oculos hic locat, ille pedes.

ALITER.

Cæcus fert claudum, atq; opera conduit eadem,

Istius ille oculos, illius iste pedes.

ALITER.

Claudum cæcus onus graue, sed tamen utile uectat.

Prospicit atq; oculis, huic regit ille pedes.

IDEM FVSIVS.

Tristis erat nimium miseris Fortuna duobus.

Huic oculos, illi dempsit iniqua pedes.

Sors illos copulat similis, claudum uehit alter.

Sic sua communi damna leuant opera.

Hic pedibus quoquis alienis ambulat, itur

Huic recta alterius semita luminibus.

IDEM ALITER.

Vtilius nihil esse potest, quam fidus amicus,

Qui tua damna suo leniat officio.

Fœdera

Fœdera contraxere simul mendicus uterq;
Cum claudio solidæ cæcus amicitia,
Claudio cæcus ait, collo gestabere nostro.
Rettulit hic, oculis cæce regere meis.
Alta superborum fugitat penetralia regum,
Inç casa concors paupere regnat amor.

ALITER.

Cum claudio cæcus sic lege paciscitur æqua, ut
Hic ferat illum humeris, hunc regat ille oculis.

PINVS NAVTICA LOQVITVR
VENTO SVBVERSA.
E GRAECO.

Pinus ego uentis facile superabilis arbor,
Stulte quid undiuagam me facis ergo ratem?
An non augurium metuis? quum persequitur me
In terra, Boream qui fugiam in pelago?

IDEM ALITER.

Ventis pinus humo sternor, quid mittor in undas?
Iam nunc passa prius quam nato naufragium.

IN NAVIM EXVSTAM.

Iam ratis æquoreas oneraria fuderat undas,
Matris at in terræ deperiit sinibus.
Corripitur flammis, atq; ardens auxiliares
Quas maris hostiles fuderat, optat aquas.

A ; Cunicula

CVNICVL A LOQVITVR, QVAE ELAPSA
MUSTELAE INCIDIT IN DISPO-

SITA VENATORVM RETIA.

Mustelam obliquo dilapsa foramine fugi,
Sed feror humanos heu misera in laqueos.

Hic ego non uitam celerem, non impetro mortem.
Seruor ut heu rapidis obijciar canibus.

Qui mea dum laniant scelerato uiscera morsu.
Spectat, & effuso sanguine ridet homo.

O durum genus, atq; fera truculentius omni,

Nex cui crudelem præbet acerba iocum.

INNOCENTIAM OBNOXIAM ESSE
INIVRIA E. GRAECO.

Ausus erit mordere malum uel mus, uetus hoc est
Verbum, sed longe res habet ipsa securus.

Innocuos audet uel mus mordere, nocentem
Tangere non audet territus ipse draco.

IN EFFLATUM VENTRIS. E. GRAECO.

Te crepitus perdit, nimium si uentre retentes.

Te propere emissus seruat item crepitus.

Si crepitus seruare potest & perdere, nunquid

Terrificis crepitus regibus æqua potest?

DE MORTIS AEQUALITATE.

E. GRAECO.

Victor ad Herculeas penetres licet usq; columnas.

Tetergæ cum alijs pars manet æqua tamen.

Iro par moriere, obolo non dñior uno,
Et tua te (sed non iam tua) soluet humus.

IN SORDIDVM. È GRAECO.

Te ditem appellant omnes, ego planè inopem te.
Nam facit usus opes, testis Apollophanes.

Sitq; utare tuis, tua fiunt, sin tua serues
Hæredi, tua iam nunc aliena facis.

VENATVS ARANAE.

Insidiata uagam comprehendit aranea muscam,
Et lentis trepidam cassibus implicuit.

Iamq; hiat in morsum, sed sæpe os inter & offam,
Ut uerbum uetus est, multa uenire solent.

Sors muscæ miseretur, & aduersatur Arachnæ,
Inq; malam è misera transtulit exitium,

En stimulante fame properans inuadis utramq;
Sturne, ruunt casas, hæc fugit, illa perit.

Sic misero spes est plerunq; secure sub ipsa,
Inter & armatos mille malo metus est.

IN CYNICVM STVLTE ABSTI-

NENTEM. È GRAECO.

Barbati Cynici, baculoq; uagantis egeni
In coena magnam conspicimus sophiam.

Scilicet hic raphanis Cynicus primum atq; lupino,
Ne uirtus uentri seruiat, abstinuit.

At niueum postq; bulbum conspexit ocellis,
Iam rigidum & sapiens excutit ingenium.

Flagitat

Flagitat atq; audie spem præter deuorat omnem,
Virtuti bulbus, nil ait officiet.

EPITAPHIVM MEDICI. E GRAECO.
Thessalus Hippocrates, Cous genere, hac iacet urna,
Phœbi immortalis semine progenitus.

Crebra trophæa tulit morborum armis medicinæ,
Laus cui magna, nec id sorte, sed arte fuit.

IN SERVVM MORTVVM. E GRAECO.
Hic seruus dum uixit, erat nunc mortuus idem
Non quām tu Dari magne minora potest.

IN ANCILLAM MORTVAM.
Ante fuit solo Sosime corpore serua,

Nunc fato pars est hæc quoq; missa manu.

IN PISCATOREM ADAMA TVM. E GRAECO.
Pisces dum captat pescator, diuitis illum

Nata uidet, uisi flagrat amore uiri.
Deinde uiro nubit, sic illi ex paupere uita,
Magna superbarum copia uenit opum.
Adstetit & ridens Fortuna ait, heu Venus haud iam
Mars erat iste tuus, Mars erat iste meus.

ALITER:
Mars erat iste meus, Venus, inquit, uerba retorquens,
Illico Sors eadem, Mars erat iste meus.

IN REPENTE FELICEM E MISERO. E GRAECO.
Non tibi quod faueat, sic te Fortuna leuauit.

Vel de te liqueat, uult sibi, quid liceat.

In mediocri

IN MEDIOCITATEM. È GRAECO.

Inuidia est peior miseratio, Pindarus inquit.

Felicitinuidiam splendida uita facit.

At nimium miseris miseramur, Pindarus inquit.

Hei nimium felix, nec miserandus ego.

Scilicet extremis longe mediocria præstant.

Infima calcantur, summa repente ruunt.

NIHIL PRODESSE TORQVERI METU

MALI VENTURI. È GRAECO.

Cur patimur stulti, namque hæc uæcordia nostra,

Vrat ut indomitus pectora nostra metus.

Seu mala non uenient, iam nos metus urit inanis.

Sin uenient, aliud fit metus ipse malum.

Ipse quidem cecini, scripsit diuinus Homerus.

IN RIDICULVM IUDICIVM. È GRAECO.

Lis agitur, surdusque reus, surdus fuit actor.

Ipse tamen iudex surdus utroque magis.

Pro ædibus hic petit æs, quinto iam mense peracto.

Ille refert, tota nocte mihi acta mola est.

Aspicit hos iudex, & quid contenditis, inquit.

An non utrique est mater? utrique alite.

AD LVCERNAM NOCTURNAM.

Lychne reuersuram ter te iurauit amica.

Hæc redit, o poenas det tibi, si deus es.

Ludenti cum nocte places, extinguere. & aufer

Tam sacra tam sacris lumina luminibus.

B Lais

LAIS ANVS AD SPECVLVM.
È GRAECO.

Nequiter arrisi tibi, quæ modo gratia, amantum
Turbam in uestibulis Lais habens iuuenum,
Hoc Veneri speculum dico. nam me cernere talem
Qualis sum nolo, qualis eram nequeo.

IN MORTIS DIEM OMNIBVS INCERTVM.
Non ego quos rapuit mors, defleo. defleo uiuos,
Quos urunt longo fata futura metu.
Fleres si scires unum tua tempora mensem.
Rides quam non sit, forsitan una dies.

IN APVM INDVSTRIAM. È GRAECO.

Mellis apes fluiios ipsæ sibi in æthere singunt.

Ipsæ quos habitant ædificant thalamos.
Grata apis humanae frugesq; facillima uitæ est.

Non bouis aut curuæ falcis egebit ope.
Tantum opus hic situla est, ubi dulcia pocula mellis
Vbertim paruo fundat ab alueolo.
Congaudete sacræ, uarios & pascite flores,
Aetherei uolucres nectaris artifices.

IN ANVM FVCIS FRVSTRÆ

VTENTEM.

Sæpe caput tinguis, nunq; tinctura senectam;

Aut tensura genis quæ tibi ruga tuis.

Desine iam faciem stibio perfundere totam,

Ne persona tibi hæc sit modo, non facies.

Quum

Quum nihil assequeris fuso stibio cōz, quid amens
 Vis tibi: nunquam Hecuben hæc faciēt, Helenen.
 IN HOMINIS NATIVITATEM. È GRAECO.
 Heus homo si memor es, quid te dum gigneret, egit
 Tum pater, ex animo iam tumor ille cadet.
 At Plato te factum dum somniat, inflat, inani
 Aeternum cōz uocat semen & æthereum.
 Factus es ecce luto, quid suspicis alta: sed istud
 Plasmate, qui te ornat, nobiliore feret.
 Quin si uera uoles audire, libidine foeda
 Natus es è coitu, guttula & è misera.

DE ASTROLOGO RIDICVLLO.

Non Cumæa sacro uates correpta furore,
 Certius afflata mente futura uidet.
 Quam meus astrologus diuina clarus in arte
 Präuidet inspecto sydere præterita.

ALIVD IN ASTROLOGVM VXORIS

IMPUDICAE MARITVM.

Astra tibi æthereo pandunt sese omnia uati,
 Omnibus & quæ sint fata futura, monent.
 Omnibus ast uxor quod se tua publicat, id te
 Astra, licet uideant omnia, nulla monent.

IN EVNDEM IAMBICVM.

O chare nobis syderum cælestium
 Inspector astris, ipse nunc Phœbus tibi
 Optem libenter indicare clanculum

B 2 Quiddam

Quiddam, quod ad te pertinens quam maxime,
 Dum cuncta lustro, deprehendi pridie.
 Sed territat Venus, minatur & mihi
 Secundum amorem, qui nihilo secundior
 Mihi sit futurus, quam fuit Daphnes prior,
 Quicquam cuius garrulus si deferam
 Delle marito, quale detuli prius.
 Nescibis ergo hoc, cæteras rerum uices
 Docebo te, nuptæ sed in rebus tuæ
 Si quid tua non cedat ex sententia,
 Hoc omnibus prius patebit, quam tibi.

ALIVD IN EVNDEM.

Quid inter alta stulte quaeris sydera?
 In humo manentis coniugis mores tuæ?
 Quid alta spectas, infiet, id est cui tu times?
 Dum iam tu, agat quid illa, quaeris in polo,
 Haec quæ libebat, interim egit in solo.

ALIVD IN ASTROLOGVM EVNDEM.

Sydera uestigans inter cælestia demens,

Cur dubia semper mente quid uxor agat?
 Si nescis qualis tibi sit, crede esse pudicam.

Quod tibi persuades si bene, iam bene habes.
 Quid cognoscere uis, quæ non nisi cognita lœdunt?

Quid fieri studio uis miser ipse tuo?
 Hic furor haud dubie est, quem iam desistere possis,

Quærere sollicite quod reperire times,

Aliud

ALIVD IN ASTROLOGVM.

Saturnus procul est, iamq; olim cæsus, ut aiunt,

Nec prope discernens à puero lapidem.

Luna uerecundis formosa incedit ocellis,

Nec nisi uirgineum uirgo uidere potes.

Iuppiter Europen, Martem Venus, & Venerem Mars,

Daphnen Sol, Hyrcen Mercurius recolit.

Hinc factum astrologe est, tua quū capit uxor amātes,

Sydera significant ut nihil inde tibi.

DE FORMA, DILEMMA IAMBIS

TRIMETRIS SCAZONTIBVS.

Quid forma confert, Hercules nihil cerno.

Si ferueas, deformis ecce formosa est.

Sin frigeas, formosa iam sit informis.

Quid forma confert, Hercules nihil cerno.

DE ASTROLOGO DE QVO SVPRA.

Sæpe suam inspectis uxorem Candidus astris,

Prædicat en uates omnibus esse bonam.

Inspectis iterum postquam uxor adultera fugit,

Prædicti uates omnibus esse malam.

PARAENESIS AD VIRTV-

TEM VERAM.

Heu miseris quicquid misero blanditur in orbe,

Illico marcescens ut rosa uerna cadit.

Nec quenquam usq; adeo placidis complectitur ulnis

Sors, ut non aliqua parte molesta premat.

B ; Imbibe

Imbibe uirtutes, & inania gaudia sperne.

Sunt animi comites gaudia uera boni.

AD CONTEMPTVM HVIVS VITAE,

Nos uelut instabiles uentus quatit omnis aristas,

Quolibet impellunt spes, dolor, ira, metus.

Nil habet in rebus pondus mortalibus ullum.

Momento pudor est si moueare leui.

MORTEM NON ESSE METVENDAM,

CVM SIT FINIS MALORVM.

È GRAECO.

Non stultum est mortem matrem timuisse quietis.

Quam fugiunt morbi, mœstaç̄ pauperies.

Sola semel miseris sese mortalibus offert,

Nec quisquam est ad quem mors iterum redit.

At reliqui morbi uarij, multiç̄ uicissim

Nunc hunc, nunc illum, terç̄ quaterç̄ premunt.

IN EPISCOPVM QVENDAM SOR-

DIDVM AC PERPARCVM.

Vita Sibyllinos mea si duraret in annos,

Non bonitas unquam præsulis excideret.

Iugera multa soli locat, amplas possidet urbes,

Centum stipatus progreditur famulis.

Me tamen exigui census, quum nuper adirem,

Excipit, & uere comiter alloquitur.

Quin abiens nigri gustarem ut pocula uini,

È loculo clauem liberat ipse suo.

De uiciss.

DE VICISSITUDINE FORTVNAE. È GRAECO.

Lubrica non seruat certum Fortuna tenorem,

Sed rotat instabilem cæca subinde rotam.

Sternere summa libet, libet infima tollere. rerum

Inq[ui]z uicem nulla uertere lege uices.

Maxima quū bona sunt, iā sunt mala proxima. rursus

Maxima quū mala sunt, proxima iam bona sunt.

Forti animo mala fer, nec bis miser esto dolore,

Ne cito uenturis præmoriare bonis.

VITA BREVIS.

Non tibi uiuacem furor est spondere senectam:

Quum non sit uitæ certa uel hora tuæ.

Finge age Nestorium sis peruenturus in æuum,"

Longa tument multis tempora foeta malis.

Omnia ut effugias uiridis quibus angitur ætas,

Tedia longa tibi curua senecta feret.

Tu tamen ad seros (nulli quod contigit) annos

Vt uenias, nullo percitus ante malo.

Hoc tamen exiguum est. ubi nunc tot Nestoris anni:

Ex tanto superest tempore nulla dies.

PATIENTIA.

Tristia qui pateris perfer, Sors tristia soluet.

Quod si non faciat Sors, tibi mors faciet.

VITA IPSA CVRSVS AD MORTEM EST.

Nugamur, mortemq[ue] procul procul esse putamus.

At medijs latet hæc abdita uisceribus.

Scilicet

Scilicet ex illa, qua primum nascimur hora,
 Prorepunt iuncto uitaq; morsq; pede.
 Partem aliquam furtim qua se metitur, & ipsam
 Surripit è uita quælibet hora tua.
 Paulatim morimur, momento extinguimur uno,
 Ut lampas oleo deficiente perit.
 Ut nihil interimat, tamen ipso in tempore mors est.
 Quin nunc, interea dum loquimur, morimur.
 DIVES AVARVS, PAVPER EST SIBI. È GRAECO
 Diuitias animi solas ego iudico ueras.
 Qui rebus pluris se facit ipse suis,
 Hunc adeo ditem, hunc opulentum rite uocamus.
 Magnarum quis sit qui uidet usus opum.
 Calculus at si quem misere numerandus adurit,
 Qui misere semper diuitias cumulet.
 Hic ut apes paruo crebroq; foramine fosso,
 Sudat in alueolo, mel alijs comedunt.

DILEMMA EPICVRI.

Deiçiat miseram tibi nulla molestia mentem.
 Si longa est, leuis est. si grauis est, breuis est.

CONTRA.

Deiçit heu miseram, prosternit & utraq; mentem.
 Longa nec ulla leuis, nec grauis ulla breuis.

DE MORTE.

Somniat, hic ditem qui se putat esse, uidetq;
 Morte experrectus illoco quam sit inops.

Sola

SOLA MORS TYRANNICIDA EST.

Duriter es quicunq; uiris oppressus iniquis,

Spem cape. spes luctus leniat alma tuos.

Versilis in melius uel te Fortuna reponet,

Vt solet excussa nube nitere dies.

Aut libertatis uindex frendente tyranno,

Eruet iniecta mors miserata manu.

Auferet hæc (quo plus tibi gratificetur) & illum,

Afferat atq; tuos protinus ante pedes.

Ille opibus tantis, fastuq; elatus inani,

Ille ferox crebris ante satellitibus,

Hic neq; toruus erit, uultu nec ut ante superbo,

Sed miser abiectus, solus, inermis, inops.

O quid uita tibi dedit unquam tale? uicissim

Iam ridendus erit, qui metuendus erat.

O Cor triste! malis misere immersumq; profundis

Rumpere sit poenæ terminus iste tuæ.

Sanguinolenta tuæ dominæ tua uulnera pande.

Illa breui est, quæ nos diuidet una duos.

Quam miser ergo diu sic heu lachrymabo, querarq;

Mors ades, & tantis horrida solue malis.

IN AMICAM FOEDIFRAGAM IOCO SVM.

Dij inelius, uenere in hac quæ somnia nocte?

Tota semel mundi machina uersa ruit.

Nec sua lux Phœbo constabat, nec sua Phœbe

Iamq; tumens omnem strauerat æquor humum.

C Maius

Maius adhuc mirum, uox en mihi dicere uisa est,
Heus tua iam pactam fregit amica fidem.

DE CVNICVLLO BIS CAPTO:

È rete extrahor, è digitis in rete relabor.

Heu semel heu fugi, bis miser ut caperer.

IN VIRGINEM MORIBVS HAVD VIRGINEIS.

Blanda, salax, petulans, audax, uaga, garrula uirgo,

Si uirgo est, uirgo est bis quoq; quæ peperit.

IN UXORES.

Hoc quisq; dicit, rebus in mortalibus.

Quod tristius sit, ac magis uiros grauet;

Natura nil produxit his uxoribus.

Hoc quisq; dicit, dicit, at ducit tamen.

Quin sex sepultis, septimam ducit tamen.

IN EASDEM.

Res uxor grauis est, poterit tamen utilis esse,

Si sua det propere se moriente tibi.

IN IMAGINEM DISSIMILEM. È GRAECO.

Hæc tua quam nuper pinxit Diodorus imago,

Cuiusuis magis est, quam tua Menodote.

IN EANDEM.

Sic se totum isthac expressit imagine pictor,

Vt nulli tam sit, quam tibi dissimilis.

CHORIAMBICVM DE VITA SVAVI.

È GRAECO.

Non est cura mihi Gygis,

Qui

Qui rex Sardibus imperat.
Aurum non ego persequor,
Reges non miser æmular.
Curæ est, barba suauibus
Vnguentis mihi perfluat.
Curæ est, ut redolentibus
Cingam tempora floribus.
Curæ sunt hodierna mi,
Nam quis crastina nouerit?
Tornato bene Mulciber
Argento mihi poculum.
Iam nunc effice concuum,
Et quantum potes imbibum.
Et fac illud ut ambiant
Non currus, neq; sydera,
Orion neq; flebilis.
Vites fac uirides mihi.
Botri fac mihi rideant
Pulchro cum Dionysio.

IN MEDICVM IMPOSTOREM, QVI
GVTTVLAM FICTI BALSAMI
MAGNO VENDIDIT.

Febre laboranti medicus, feret o tibi certe
Aut nihil, aut tantum balsamus, inquit, opem.
Sed nemo me præter habet, per paululum & ipse,
Gutta emitur libris non minus una decem.

C 2 Nunc

Nunc mihi quinq; dabis, reliquas mihi quinç daturus

Sanus, ut has nunquam te moriente, petam.

Nunquam rem facies, tanto in discrimine qui uis

Tam charæ guttæ ponere dimidium.

Pacta placent, minimoç è uitro & sindone testo,

Iacta petit gladij cuspide gutta merum.

Abluat ut uino mucronem, æger obsecrat, absit,

Inquit, adhuc libras bis habet ille decem.

Gutta, ait, una sat est, & erat satis, unica tantum

Gutta potest, unam uix bibit, & moritur.

O nimis aduerso contractum sydere pactum.

Hinc guttæ, hinc uitæ dimidium perit.

IN FVCATAM. È GRAECO.

Tinguis capillos fœmina, at qui scis, rogas?

Nigri suere quum referres è foro.

IN IMAGINEM MALE PICTAM.

Effigie studuit tua in hac ostendere pictor,

Expressisse queat quam tibi dissimilem.

IN EANDEM.

Hactua tam uere est facies expressa tabella,

Vt iam non tabula hæc sit tibi, sed speculum.

IN EANDEM.

Quam mihi monstrasti demiror Posthumus pictor,

Effigiem quanta finxerat arte tuam.

Inspicit hanc quisquis, si te conspicerit unquam,

Si non artificis tangitur inuidia.

Tam

Tam similem hic ouo non esse fatebitur ouum,
Effigies hæc est quam tibi dissimilis.

IN ANGLVM, GALLICAE LIN-
GVÆ AFFECTATOREM.

Amicus & sodalis est Lalus mihi,
Britanniaç natus, altusç insula.
At cum Britannos Galliæ cultoribus
Oceanus ingens, lingua, mores, dirimant,
Spernit tamen Lalus Britannica omnia.
Miratur, expetitç cuncta Gallica.
Toga superbit ambulans in Gallica,
Amatç multum Gallicas lacernulas.
Zona, locello, atç ense gaudet Gallico.
Filtro, bireto, pileoç Gallico,
Et calceis, & subligare Gallico,
Totoç deniq; apparatu Gallico.
Nam & unum habet ministrum, eumç Gallicum.
Sed quem (licet uelit) nec ipsa Gallia
Tractare quiret plus (opinor) Gallice,
Stipendi; nihil dat, atq; id Gallice.
Vestitç tritis pannulis, & Gallice hoc.
Alit cibo paruo, & malo, idç Gallice.
Labore multo exercet, atç hoc Gallice.
Pugniscç crebro pulsat, idç Gallice.
In coetu & in uia, & foro, & frequentia
Rixatur, obiurgatç semper Gallice.

C , Quid;

Quid? Gallice illud? imo semigallice.
Sermonem enim (ni fallor) ille Gallicum
Tam callet omnem, quam Latinum Psytacus.
Crescit tamen, sibiq; nimirum placet,
Verbis tribus si quid loquatur Gallicis.
Aut Gallicis si quid nequit uocabulis,
Conatur id, uerbis licet non Gallicis,
Sonoq; saltē personare Gallico,
Palato hiante acutulo quodam sono,
Et foeminæ instar garrientis molliter,
Sed ore pleno, tanquam id impleant fabæ.
Balbutiens uidelicet suauiter
Prellis quibusdam literis, Galli quibus
Ineptientes abstinent, nihil secus,
Quam uulpe gallus, rupibusq; nauita.
Sic ergo linguam ille & Latinam Gallice,
Et Gallice linguam sonat Britannicam.
Et Gallice linguam refert Lombardicam.
Et Gallice linguam refert Hispanicam.
Et Gallice linguam sonat Germanicam,
Et Gallice omnem, præter unam Gallicam.
Nam Gallicam solam sonat Britannice.
At quisquis insula fatus Britannica,
Sic patriam insolens fastidiet suam,
Ut more simiae laboret fingere,
Et æmulari Gallicas ineptias,

Ex amne

EPIGRAMMATA.

211

Ex amne Gallo ego hunc opinor ebrium.
Ergo ex Britanno ut Gallus esse nititur.
Sic Diū iubete, siat ex gallo caput.

IN NICOLAVVM MALVM
MEDICVM.

Nunc uideo haud rerum tantum, sed & ipsa uirorum
Nomina, non temere, sed ratione dari.
Nicolaus nomen medici est, qui conuenit; inquis,
Hoc potius nomen debuit esse ducis.
Dux populos armis uincit, sed & iste uenenis
Et populum, & forteis sternit ubiqꝫ duces.
Sæpe ducem bello repetunt, bis nemo rebellat.
Huic medico, uero est nomine Nicolaus.

IN IMAGINEM ELEGANTEM,
SED DEFORMISSIMI.

Ipsam iudice me Venerem superabat Apellis,
Hæc tua quæ uisa est nuper imago mihi.
Pictor in hanc omnes unam consumperat artes,
Spectari hac una quid ualuit, uoluit,
Qualia in re decor, qui nasus, qualia labra,
O quales oculi, qualis ubiqꝫ color.
Tam fuit ex omni longe pulcherrima parte;
Quam fuit à nulla parte tibi similis.

IN IMAGINEM DISSIMILEM.

Nuper ut ingredior pictoris forte tabernam,
Effigies oculis est tua uisa meis.

Ex te

Ex te dum pictor sic exprimat omnia, uultum

Immotum credo te tenuisse diu.

Sic te totum inspecta refert, intelligo cuia est

Protinus ut pictor rettulit esse tuam.

IN PARCVM MORIENTEM,

Chrysalus heu moritur diues, dolet, ingemit, unquam

Nemo magis tristi pectore fata tulit.

Non quoniā ipse perit, cui nil se uilius ipso est,

Sed nummi pereunt quatuor in tumulum.

IN GRAMMATICVM PVTIDVM.

Quū mihi grammaticus mentem subit Heliodorus,

Nostra Solēcismos illico lingua timet.

IN PROGNOSTEN RIDICVLVM.

Hoc anno in regno rex nobilis ille quiescat

Gallorum, celeber scripserat astrologus.

Rex ubi uix cœpto uita defungitur anno,

Iam nil se uates quo tueatur, habet.

Rem quidam prorsum cœpit defendere, uerum est

Augurium, rex iam nonne quieuit? ait.

Latius hoc uerbum prorepit, & undiq; ridens

Id populus, rex iam nonne quieuit? ait.

Audit ut in populo hoc uates, iam serio uerum est

Augurium, rex iam nonne quieuit? ait.

IN VEHEMENTER NASVTVM. È GRAECO,

Nunquam Procle manu nares emungere possis.

Nam tua nare manus, magna licet, minor est.

Quando

Quādo Iouem inclamas sternutans, quippe nec audis
Tam procul ab nasus prominet aure tuus.

IN POETAM FVRIOSVM.

Sunt etiam in Musis furiae, quibus ipse poëta

Fis, per quas temere carmina multa facis.

Ergo age plurima scribe precor. tibi nempe furorem

Non ego maiorem quem precer inuenio.

IN PERPV SILLVM. È GRAECO.

Grus ne te rapiat Pygmeo sanguine gaudens,

Si sapias, media tutus in urbe mane.

NEGLIGENDOS VVLGI RV

ALIUS MORES. È GRAECO.

Tu te ipsum oblectes, & uulgi uerba loquacis

Sperne. bene hic de te dicet, & ille male.

IN FATVVM. È GRAECO.

Quem mordent pulices extinguit Morio lychnon,

Non me inquit cernent amplius h̄i pulices.

DE SOMNO. È GRAECO. SEN.

TENTIA ARISTOTELIS.

Fermè dīmidium uitæ dormitur. in illo

Aequales spacio diues, inopsq; iacent.

Ergo Crœse tibi regum ditissime, uitæ

Fermè dīmidio par erat Irus egens.

ALIVD.

Non es dum in somno es, dum nec te uiuere sentis.

Felix, at somnus ni ueniat, miser es.

D Qui

Qui felix igitur sorte indulgente superbit,
Inflatusq; leui prosperitate tumet,
Nox quoties uenit, aut toties iam desinit esse
Felix, aut toties incipit esse miser.

QVID INTER TYRANNVM
ET PRINCIPEM.

Legitimus immanissimis
Rex hoc tyrannis interest.
Seruos tyrannus quos regit,
Rex liberos putat suos.

SOLLICITAM ESSE TYRANNI VITAM.
Magna diem magnis exhaust cura tyrannis,
Nocte uenit requies, si tamen ulla uenit.
Nec tamen hi pluma requiescunt mollius ulla,
In dura pauper quam requiescit humo.
Ergo tyranne tibi haec pars felicissima uitæ est,
In qua mendico par tamen esse uelis.

BONVM PRINCIPEM ESSE PATREM,
NON DOMINVM. IAMBICVM.

Princeps pius nunquam carebit liberis,
Totius est regni pater.
Princeps abundat ergo felicissimus
Tot liberis, quot ciuibus.

DE BONO REGE ET POPVLO.
Totum est unus homo regnum, idq; cohaeret amore,
Rex caput est, populus cætera membra facit.

Rex

Rex quot habet ciues (dolet ergo perdere quenqz)

Tot numerat parteis corporis ipse sui.

Exponit populus sese pro rege, putatqz

Quilibet hunc proprij corporis esse caput.

BONA NON COGNOSCI, NISI

DVM AMITTVNTVR.

Perdendo bona nostra ferè cognoscimus omnes.

Dum possidemus, spernimus.

Sic populo quoqz sæpe malus, sed sero benignum

Commendat hæres principem.

TYRANNVM IN SOMNO NIHIL

DIFFERRE A PLEBEIO.

Erigit ergo tuas insane superbia cristas,

Quod flexo curuat se tibi turba genu.

Quod populus nudo surgat tibi uertice, quod sit

Multorum in manibus uitâqz, morsqz tuis.

At somnus quoties artus adstringit inertes,

Hæc tua iam toties gloria dic ubi sit?

Tunc ignaue iaces trunco non impar inani.

Aut paulo functis ante cadaueribus.

Quod nisi conclusus timide intra tecta lateres,

In cuiusqz foret iam tua uita manu.

DE PRINCIPE BONO

ET MALO.

Quid bonus est princeps, canis est custos gregis inde

Qui fugat ore lupos, quid malus? ipse lupus.

D 2 In raptore

IN RAPTOREM ET PATRONVM.

Raptam se queritur uirgo, crimenq; negari

Non potuit, raptor iam periturus erat.

Callidus at subito patronus protrahit ipse

Membrum deducta ueste uirile rei,

Hoccine uirgo tua membrum fuit, inquit, in alio;

Illa uerecundo mota pudore negat.

Vicimus o iudex clamat patronus. ea ipsa est.

Id negat en sine quo se negat ipsa rapi.

IN FVREM ET PATRONVM.

Dum furti metuit damnari Clepticus, amplio

Non sine consuluit munere causidicum

Sic ubi saepe diuq; immensa uolumina uoluit

Spero ait effugies Cleptice, si fugias.

IN ASTROLOGVM QVI FACTVM

PRAEDIXIT. È GRAECO.

Sæpe patri frater quod debuit esse superstes,

Hoc uelut uno omnes astrologi ore canunt.

Ast Hermoclides obitum præ patre solus

Dixit, sed dixit postquam obiisse uidet,

IN HVIVS VITÆ

VANITATEM.

Damnati ac morituri in terræ claudimur omnes

Carcere, in hoc mortem carcere nemo fugit,

Carceris in multas describitur area partes.

Inq; alijs alijs partibus ædificant,

No

Non aliter quām de regno de carcere certant.
In carcere cupidus carcere condit opes,
Carcere obambulat hīc uagus, hīc uincitur in antro,
Hic seruit, regit hīc, hic canit, ille gemit.
Iam quoq; dum carcer non tanquām carcer amatetur,
Hinc alijs alij mortibus extrahimur.

REGEM NON SATELLITIVM,
SED VIRTUS RED-
DIT TV TVM.
Non timor inuisus, non alta palatia regem,
Non compilata plebe tuentur opes,
Non rigidus uili mercabilis ære satelles
Qui, sic alterius fiet ut huius erat.
Tutus erit populum, qui sic regit, utiliorem
Ut populus nullum censeat esse sibi.

POPVLVS CONSENTIENS REGNVM

DAT ET AVFERT.

Quicunq; multis uir uiris unus præst,
Hoc debet his quibus præst.
Præesse debet neutiquām diutius

Hi quām uolent quibus præst.
Quid impotentes principes superbiunt:

Quod imperant precario?

IN PERPVSILLVM. È GRAECO.

Ex atomis Epicurus totum fabricat orbem.
Alchime, dum nihil his credidit esse minus,

D 3 Ex te

Ex te fecisset si tum Diophante fuisses,

Nempe atomis multo es tu Diophante minor.

Aut forte ex atomis iam cætera scriberet esse,

Astipsas ex te scriberet esse atomos.

IN AMOREM CASTVM ET IN-
CESTVM. È GRAECO.

Hi duo detraxere duos incestus & almus,

Dum contra occurrunt hinc amor, inde pudor.

Phedram amor Hippolyti cōsumpserat igneus, ipsum

Interimiq; sacer proh pudor Hippolytum.

IN VRBEM ROMAM. È GRAECO.

Gradiui genus Hector aue, si quid sub humo audis,

Respira, & patriæ nomine cresce tuae.

Ilios urbs colitur, nunc indyta, gens colit illam,

Quam tu Marte minor, Martis amica tamen.

Mirmydones perierte, ades & dic Hector Achilli,

Esse sub Aeneadis undiq; Thessaliam.

DE MEDIOCRITE. È GRAECO.

Ingratū est quicquid nimū est, sic semper amarū est,

Vt uerbum uetus est, mel quoq; si nimium est.

IN VEHEMENTER INFELI-
CEM. È GRAECO.

Nunquam uixisti o pauper nunquam morieris.

Nempe miser uisus uiuere mortuus es.

At quibus immensa est fortuna, pecunia multa,

His uitæ finem mors aliquando facit.

In Pythagoræ

IN PYTHAGORAE ECHEMY,
THIAM. È GRAECO.

Rebus in humanis magna est doctrina tacere,
Testis erit sapiens hic mihi Pythagoras.
Nempe loqui doctus, reliquos docet ille tacere.
Magnū hoc ad requiem pharmacon inueniens.

RIDICVLVM IN

GELLIAM.

Quid modo sacerdotum miremur monstra priorum,
Quod loquitur taurus, quod cadit imbre lapis.
Monstra antiqua nouum superat. surrexerat ecce,
Ante tenebrosum Gellia uesper heri,
Plus dicturus eram, nisi me ridere putares,
Surrexit medium, sed tamen ante diem,
Mira licet sāpe illa tamen uidere priores,
Sāpe potest forsan cernere posteritas,
Istud at hesternam nemo unquam uidelerat ante,
Et post hanc poterit nemo uidere diem.

IN PALLADEM, VENEREM,

QVE. È GRAECO.

Cur ita me laedita Venerem tritonia uirgo,
Corripis in digitos, cur mea dona tuos?
Scilicet Idæis memor esto in rupibus olim.
Me non te pulchram censuit esse París.
H. ista tua est, ensisq; tuus. mihi uendico malum.
Mars modo sit malo pristinus ille satis.

Vitam

VITAM HOMINIS
ESSE NIHIL.

Nos tenuem strictis spirantes aëra fibris,
 Viuimus & Phœbi lampada conspicimus.
 Quotquot viuimus hic sumus omnes organa, quæ
 Viuificis animat flatibus aura leuis,
 Quot tua si tenuem restringat palma uaporem
 Eripiens animam miseris usq; stygem.
 Sic sumus ergo nihil. Plutoni pascimur omnes,
 E flatu minimo nos leuis aura fouet.

IN PUGNIONEM EBETEM

EBETIS. È GRAECO.

Plumbeus hic mucro tuus est obtusus, ebesq;
 Mucro aciem ingenij fert tuus iste tui.

DE GLORIA ET PO-

PVLI IUDICIO.

Maxima pars hominum fama sibi plaudit inani,
 Atq; leuis uento fertur in astra leui.
 Quid populi tibi uoce places? saepe optima cæsus,
 Dat uicio. & temere deteriora probat.
 Sollicitus pendes alieno semper ab ore.
 Ne laudem cerdo quam dedit, eripiat.
 Fors tamen irridet quo tu laudante superbis.
 Ex animo laudet: laus tamen illa fugit.
 Quid tibi fama facit? toto lauderis ab orbe,
 Articulus doleat, quid tibi fama facit?

Ridiculum

RIDICULVM IN MINISTRVM.

Muscas è cratere tulit coniuia priusquam
Ipse bibit, reddit rursus, ut ipse bibit.
Addidit & causam muscas ego non amo dixit,
Sed tamen è uobis nescio num quis amet.

DE CANE VENANTE.

Os canis implet anas alium capturus hiabat,
Non capit, at quam iam ceperat ore fugit.
Sic miser interea dum rem captas alienam,
Sæpius & merito perdis auare tuam.

CANIS IN PRAESEPI,

AVARVS HOMO.

In præsepe canis fœno nec uescitur ipse,
Nec sinit ut fœnum qui cupit edat equus.
Seruat auarus opes, opibus non utitur ipse,
Atque alios uti qui cupiunt, prohibet.

IN ORESTEM PARANTEM

OCCIDERE MATREM.

Quâ gladium intrudes per uentre mne an' ne papillas?
Te peperit uenter, te lactauere papillæ.

QVID PAVCIS ORAN-

DVS DEVS.

Da bona siue rogere deus, seu nulla rogere,
Et procul à nobis mala quæq; potentibus aufer,
Et mala siue petare nega, seu nulla petare.

E In

IN DIGAMOS. È GRAECO.

Qui capit uxorem defuncta uxore secundam,
Naufragus in tumido bis natat ille freto.

IN FATVM. È GRAECO.

Si ferris ferre & fer . sin irasceris,& te

Læseris,& quod fert te feret, immo trahet.

DE SOMNO AEQVANTE PAV
PEREM CVM DIVITE.

Somne quies uitæ spes & solamen egenis,

Diuitibus noctu, quos facis esse pares.

Tristia demulcens lethæo pectora rore,

Excritis & sensum totius inde mali.

Læta benignus opes inopi per somnia mittis.

Quid falsas rides diues opes inopis?

Diuitibus uere curas, tormenta , dolores,

Pauperibus false gaudia uera ferunt.

IN DEFORMEM ET IMPROBVM. È GRAECO

Pingere difficile est animum, depingere corpus,

Hoc facile est , in te sunt tamen ambo secus.

Nam praus animi mores natura reuelans,

Fecit ut emineant undiq; perspicui.

Sed formæ portenta tuæ deformia membra

Quis pingat: quando hæc cernere nemo uelit?

IN CAPPADOCEM VIRVLEN/

TVM. È GRAECO.

Vippera Cappadocē mordens mala protinus hausto,

Tabifico perijt sanguine Cappadocis.

In statuam

IN STATVAM FERREAM. È GRAECO.

Effigiem statuere tibi rex perditor orbis

Ex ferro, ut longe uilius ære foret.

Hoc fecere fames, cædes, furor æris, egestas,

Hæc tua, quis omnes perdit avaritia.

VERSUS IAMBICI DIMETRI BRACHY-

CATALECTICI AD CANDI-

DVM, QVALIS VXOR

DELIGENDA.

Iam tempus id petit

Quod à prioribus

Monetq; Candide,

Prius reperis

Vagis amoribus

Non absq; fœnore

Tandem renuncies,

Repende posteris.

Tandemq; desinas

Non sit tibi tamen

Incera Cypridis

Hæc cura maxima

Sequi cubilia.

Spectare Candide

Quæraq; uirginem,

Quid dotis afferat,

Quam rite iam tibi

Quàm sit ue candida,

Concorde uincias

Infirmus est amor,

Amore coniugem,

Quem stultus impetus

Quæ iam genus tuum,

Decore concitus

Quo nil beatius,

Parit, uel improbus

Fœcunda dulcibus

Ardor pecuniæ.

Natis adaugeat,

Quicunq; amauerit

Pater tibi tuus

Propter pecuniam

Hoc ante præstifie

Amatur huic nihil

E 2 Præter

Præter pecuniam.
Capta pecunia
Vanescit ilico,
Item fugax amor,
Feréq; iam prius
Perit quām nascitur.
At nec pecunia,
Quam auarus antea
Miser cupuerat,
Iuuare postea
Quicquām potest, ubi
Quam non amauerit
Inuitus, attamen
Omnino cogitur
Tenere coniugem.
Quid forma: nunq; hæc
Vel febre decidit:
Anniſ ue deperit:
Ut sole flosculus
Tum defluentibus
Genæ coloribus.
Amor ligauerant
Quem hæc sola uincula
Solutus aufugit.
At uerus est amor,
Quem mente perspicax,

Ratione consule
Prudens iniuerit,
Et quem bono omine
Virtutis inclytæ,
Quæ certa permanens
Non febre decidit,
Anniſ ue deperit,
Respectus efficit.
Primum ergo quam uoles
Amice ducere.
Quibus parentibus
Sit orta perspice.
Ut mater optimis
Sit culta motibus,
Cuius tenellula
Mores puellula
Insugat, exprimat.
Tum qua sit indole,
Quam ducis, hoc uide,
Ut ore uirginis
Insit serenitas,
Ab ore uirginis
Absitq; toruitas.
At rursus ut tamen
Sit in genis pudor,
Nec ore uirginis
Insit

Insit procacitas,
Et sit quieta, nec
Cingat salacibus
Viros lacertulis,
Vultu modesta sit,
Nec spectet undiqz
Vagis ocellulis.
Proculqz stulta sit
Paruis labellulis
Semper loquacitas.
Proculqz rusticum
Semper silentium.
Sit illa uel modo
Instructa literis,
Vel talis ut modo
Sit apta literis.
Felix, quibus bene
Priscis ab optimis
Possit libellulis
Vitam beatia
Haurire dogmata.
Armata, cum quibus
Nec illa prosperis
Superba turgeat,
Nec illa turbidis
Misella lugeat

Prostrata casibus
Iucunda sic erit
Semper, nec unquam erit
Grauis, molestiae
Vitae comes tuae.
Quae docta paruulos,
Docebit & tuos
Cum lacte literas
Olim nepotulos.
Iam te iuuauerit
Viros relinquere,
Doctaeqz coniugis
Sinu quiescere.
Dum grata te fouet,
Manuqz mobili.
Dum plectra personat,
Et uoce qua nec est
Progne sororculae
Tuæ suauior.
Amœna cantilat,
Apollo quæ uelit
Audire carmina.
Iam te iuuauerit
Sermone blandulo.
Docto tamen, dies
Noctesqz ducere.

E ; Notare

Notare uerbula
 Mellita maximis
 Non absq; gratijs
 Ab ore melleo
 Semper fluentia,
 Quibus cohercat.
 Si quando te leuet
 Inane gaudium,
 Quibus leuauerit,
 Si quando deprimat
 Te mœror anxius
 Certabit, in quibus
 Summa eloquentia.
 Iam cum omnium graui
 Rerum scientia.
 Talem olim ego putem,
 Et uatis Orphei
 Fuisse coniugem.
 Nec unquam ab inferis
 Curasset improbo
 Labore fœminam
 Referre rusticam,
 Talemq; credimus
 Nasonis indytam,
 Quæ uel patrem queat
 Aequare carmine,
 Fuisse filiam.
 Talemq; suspicor
 Qua nulla charior
 Vnquam fuit patri,
 Quo nemo doctior
 Fuisse Tulliam.
 Talisq; quæ tulit
 Gracchos duos, fuit
 Quæ quos tulit, bonis
 Instruxit artibus.
 Hoc profuit minus.
 Magistra quam parens,
 Quid prisca sæcula,
 Tandem reuoluimus?
 Vt cuncti rusticum,
 Vnam tamen tenet
 Nostrumq; virginem
 Tenet, sed unicam.
 At sicut unicam
 Plerisque præferat.
 Cuiq; conferat
 Ex his fuisse, quæ
 Narrantur omnibus
 Tot retro sæculis,
 Quæ nunc & ultimam
 Monet Britanniam

Perlatu

Perlata penulis
Fame uolucribus.
Laus atq; gloria
Orbis puellula
Totius unica,
Ac non modo suæ
Cassandra patriæ.
Dic ergo Candide,
Si talis & tibi
Puella nuberet,
Quales ego tibi
Supra recensui.
Desit licet queas
Formam requirere.
Dotis ue quod parum
Lucrere conqueri,
Hic sermo uerus est,
Quæcunq; sit satis
Est bella quæ placet,
Nec quisq; habet magis,
Quam qui sibi satis

Quodcunq; habet putat.
Sic nunc me amet mea.
Ut nil ego tibi
Amice mentiar,
Cuicunq; gratiam
Formæ negauerit
Natura uirgini.
Certe licet siet
Carbone nigrior.
Foret tamen mihi hac
Virtutis indole
Olore pulchrior.
Cuicunq; lubrica
Dotem negauerit.
Fortuna uirgini
Certe siet licet
Vel Iro egentior
Foret tamen mihi hac
Virtutis indole
Te Crœse ditione.

RIDICULVM IN MINACEM.

Thrasonis uxorem Bubulcus rusticus
Absentē eo uitiauerat,
Domum reuersus miles ut rem comperit,
Armatus & ferus infiltrat.

Tandem

Tandem assequutus solum in agris rusticum,
 Heus clamat heus heus Furcifer.
 Restat bubulcus, saxaq; in sinum legit.
 Ille ense stricto clamitat,
 Tu coniugem meam attigisti carnifex?
 Respondit imperterritus,
 Feci. fateris, inquit? At ego omnes deos,
 Deasq; testor o scelus,
 In pectus hunc ensem tibi capuló tenus,
 Ni fassus esles, abderem.

DE MEDIOCITATE.

È GRAECO.

Agros ego haud porrectiores appeto
 Non auream aut Gygis beatitudinem.
 Quæ sit satis sibi, uita sat eadem est mihi,
 Illud nihil nimis, nimis mihi placet.

HECTOR MORIENS. È GRAECO.

Proiecítote meum Danai post fata cadauer,
 Nam metuunt lepores occisi membra leonis.

IN STVLTVM POËTAM.

Scripserat Aeneam nulli pietate secundum,
 Vates secundus nemini.
 Quidam igitur regem dum uult laudare, Maronem
 Pulchre æmulatus scilicet,
 Hic hic est, inquit, princeps cui nemo secundus.
 Haclaude rex indignus est,

Ipse sed

Ipsæ sed est uates dignissimus. ergo age demus

Vtricq; laudem debita m.

Hic hic est igitur uates, cui nemo secundus,

Rex qui secundus nemini.

IN QVENDAM QVI SCRIPSERAT HY-
MNOS DE DIVIS PARVM DOCTE,
TESTATVS IN PRAEFATIONE
SE EX TEMPORE SCR-
PSISSE, NEC SER-
VASSE LEGES
CARMINVM,
ET ARGVMEN-
TVM NON RECIP-
RE ELOQVENTIAM.

Hic sacer Andreæ cunctos ex ordine fastos

Perstringit mira cum breuitate liber.

Ipsos quos cecinit superos dum scriberet omnes,

Credibile est uati consuluisse suo.

Nam subito scripsit, sed sic ut scribere posset

Quantumuis longo tempore non melius.

Etpia materia est, prisci q; intactus ab ipsis

Seruatus fato est huic operi iste stilus,

Seq; q; ad numeros non anxius obligat omnes,

Hoc quoq; non uitio, sed ratione facit.

Maiestas operis metro esse obnoxia non uult,

Nempe ibi libertas est, ubi spiritus est,

F Ipsa

Ipsa operis pietas indocto sufficit. At tu
 Castalio quisquis fonte bibisse soles,
 Singula si trutines, erit hinc tibi tanta uoluptas.
 Quanta tibi ex alio non fuit ante libro.

IN STRATOPHONTA PVGILEM
 IGNAVVM. È GRAECO.

Dux Ithacus, patria bis denos abfuit annos.
 Quum redijt, celeri cognitus usq; cani est.
 Te pugil o Stratophon, certantem quatuor horas,
 Et canis & populus dedidicere simul.
 Quin etiam speculum de te si consulis ipse.
 Iuratus Stratophon te Stratophonta neges.
 IN PVGILEM IGNAVVM.
 È GRAECO.

Nesimus ecce pugil uatem consultat Olympum,
 An uentura sibi sera senecta foret.
 Fors rude donatus uiues ait ille, minatur
 Certanti gelidus sed tibi falce deus.

IN PARASITVM. È GRAECO.

Stare putas stadio Eutychides quum curreret, at quum
 Curreret ad coenam, nempe uolare putas.

IN BIBONEM. È GRAECO.

Serta, unguenta, meo ne gratificare sepulchro.
 Vina, focus, lapidi sumptus inanis erit.
 Hec mihi da uiuo, cineres miscere falerno,
 Nempe lutum facere est, non dare uina mihi.
 In bibonem.

R. 1
tu
foles,
uoluptas
te libro.
/ GILEN
ECO,
it annos.
sq; canis
quatuor
fimul.
lis ipse.
ophonantur
AVVM
ar Olympi
foret
inatur
e deus.
GRAECO
am camere
uolare pum
GRAECO
e sepulcro
nanis crit.
falerno,
dare uolum
Labb
EPIGRAMMATA.

231

IN BIBONEM. È GRAECO.

E terra genitus, sub terram morte recondar,
Ergo lagenā mihi terrea, plena ueni.

IN MULIEREM FOEDAM.

È GRAECO.

Te speculum fallit, speculum nam Gellia uerum,
Si semel inspiceres, nunquam iterum inspiceres.

IN FOEDAM. È GRAECO.

Fuggerit ad Parthos, uel ad Herculis usq; columnas.
Visa semel, positis uestibus, Antipatra.

IN FOEDAM. È GRAECO.

Qui miser uxorem deformem duxit, habebit
Vespere, iam accenso lumine, adhuc tenebras.

**IN BARBA TANTVM PHILO-
SOPHVM. È GRAECO.**

Si promissa facit sapientem barba, quid obstat
Barbatus possit quin Caper, esse Plato?

DE LICENTIA.

Vltra concessos indulta licentia fines
Prouehitur celeri, non reuocanda, gradu.

Si patiare pedem calcet tibi uespere coniunx,
Calcabit surgens hæc tibi mane, caput.

EPITAPHIVM ABYNGDONII

CANTORIS.

Attrahat huc oculos, aures attraxerat olim
Nobilis Henricus cantor Abyngdonius.

F 2 Vpus

Vnus erat, nuper mira qui uoce sonaret,

Organa qui scite tangeret, unus erat.

Vellensis primo templi decus, inde facillum

Rex illo uoluit nobilitare suum.

Nunc illum Regi rapuit deus, intulit astris.

Ipsis ut noua sit gloria cælitibus.

ALTERVM DE EODEM.

Hic facet Henricus, semper pietatis amicus.

Nomen Abyngdon erat, si quis sua nomina querat.

Vuellis hic ecclesia fuerat succendor in alma.

Regis & in bella cantor fuit ipse capella.

Millibus in mille cantor fuit optimus ille.

Præter & hæc ista, fuit optimus orgæqnista.

Nunc igitur Christe quoniam tibi seruunt iste

Semper in orbe soli, da sibi regna poli.

IN IANVM HAEREDEM ABYNGDONII

Scripti elegum carmen, Iano me hærede rogante,

Quod tumulum Henrici signet Abyngdonii.

Displacet, & doctis bene displicuisset, at illi

Displacet hoc tantum si quid inest melius.

Non resonant isti uersus ait, illico sensi

Qualeis lactucas talia labra petant.

Ridendos ergo ridens effutio uersus.

Hos uorat applaudens Ianus utrāq; manu.

Hos tumulo insculpsit, sub eundem protinus obdi.

Atq; ijsdem dignus uersibus ipse legi.

Anne

Ante, retrōq; bifrons Ianus deus omnia uidit.
Talpa, effrons uidet hic Ianus utrinq; nihil.

AD AVLICVM.

Sæpe mihi iactas faciles ad principis aures
Liber, & arbitrio ludis ut ipse tuo.
Sic inter domitos sine noxa sæpe leones,
Luditur, ac noxæ non sine sæpe metu.
Infremit incerta crebra indignatio caussa.
Et subito mors est, qui modo ludus erat.
Tuta tibi non est, ut sit secura uoluptas
Magna tibi est, mihi sit dummodo certa, minor.

IN TYNDALVM

DEBITOREM.

Ante meos quām crediderā tibi Tyndale nummos,
Quum libuit, licuit te mihi sæpe frui.
At nunc si tibi me fors angulus offerat ullus,
Haud secus ac uiso, qui pauet angue, fugis.
Non fuit unq; animus mihi crede reposcere nummos
Non fuit, at ne te perdere cogar, erit.
Perdere te saluo nummos uolo, perdere utrunq;
Nolo, sat alterutrum sit periisse mihi.
Ergo tibi nummis, aut te mihi redde, retentis.
Aut tu cum nummis te mihi redde meis.
Quod tibi si neutrum placeat, nummi mihi saltem
Fac redeant, at tu non rediture, Vale.

F , In

THOMAE MORI
IN MENDICVM GERENTEM
SE PRO MEDICO.

Tu te fers medicum, nos te plus esse fatemur.
Vna tibi plus est litera, quam medico.

IN VXOREM IMPUDICAM.
Est fœcunda mei fœcunda est uxor Arati,
Nempe suo genuit ter sine fœta viro.

IN PERPVSILLVM. È GRAECO.
Ut fugeret miseræ Diophantus tedia uitæ,
Vsus Arachneo est stamine, pro laqueo.

DE PVELLA QVAE RA-
PTVM FINXIT.

Conspiceret solam iuuenis cum forte puellam,
Et sibi oportunum crederet esse locum,
Improbis inuitam cupidis amplectitur ulnis,
Basiacq; & plusquam basia ferre parat.
Illa reluctata est, legemq; irata minatur.

Qua miser effuso sanguine raptor, obit.
Instetit ille tamen iuuenili ardore proterius,
Nunc precibus satagit, nunc superare metu.
Non precibus, non illa metu superata, reclamat,
Calce petit, mordet dente, manuq; ferit.
Ira subit iuuenem iam penè libidine maior,
Et ferus o demens siccine pergis, ait,
Per tibi ego hunc ensem iuro, simul extulit ensem,
Commoda ni iaceas, ac taceas, abeo.

Ilico succubuit tam tristi territa uerbo
Atq; age, sed quod agis, ui tamen, inquit, agis.

IN CHRY SALVM.

Chrysalus in syluis loculos quum conderet, hæsit.
Certa loci possent, quæ sibi signa capi.
At super ut summa raucum uidet arbore coruum.
Hic mihi conspicua est, inquit, abitq; nota
Capti sola scopi redeuntem copia lusit,
Nam sua iam in quauis arbore signa uidet.

IN ASTROLOGVM.

Dum tua quos noster celebrat pro uatibus error,
Fata ciente positu syderis Astrologi,
Hæc dum stella fauet, dumq; hæc tibi stella minatur,
Pendula mens inter spemq; metumq; tua est.
Prospera seu uenient, uenient reticentibus illis.
Affolet & subitum lætius esse bonum.

Seu uenient aduersa, diu nescire iuuabit.
Vsura & medi temporis usq; frui.
Quin iubeo fatis etiam prohibentibus ipsis
Factibi mens hilares transigat æqua dies.

IN CRUCE DIGNVM. È GRAECO.

Mastauron elementa tibi duo subtrahe prima,
Nemo te reliquis dignior esse potest.

EPITAPHIVM. È GRAECO.

Quatuor hic tumulus fratres complectitur, ex his
Prohdolor una duos lux parit, ac perimit.

E græco.

E GRAECO:

Fortis erat bello Timocritus, hic iacet ergo.

Fortibus haud parcis Mars ferè, sed timidis.

E GRAECO.

Ista Neoclidæ gnatos habet urna gemellos
Seruitio hic patriam liberat, hic uitio.AD QVENDAM CVI VXOR
MALA DOMI.Vxor amice tibi est semper mala, quum male tractas
Fit peior, sed fit pessima, quando bene.Sed bona si moriatur erit, melior tamen id si
Te faciat uiuo, ast optima si propere.DE NAVTIS EIICIENTIBVS MONA/
CHVM IN TEMPESTATE, CVI
FVERANT CONFESSI.Cum tumida horrisonis insurgeret unda procellis,
Et maris in lassam ferueret ira ratem,

Relligio tumidis illabitur anxia nautis,

Heu parat exclamant hoc mala uita malum.

Vectores inter Monachus fuit, huius in aurem
Se properant uitijs exonerare suis.

Ast ubi senserunt nihilo sibi mitius æquor,

Sed rapido puppim uix superesse freto.

Quid miri est ait unus, aqua si uix ratis extat,

Nostrorum scelerum pondere adhuc premitur.

Quin

Quin monachū hūc, in quē culpas exhausimus om̄eis,

Ej̄cite, & secum hinc crīmina nostra ferat.

Dicta probant, rapiuntq; uirū, simul in mare torquēt,

Et l'ntrem leuius quām prius isse ferunt.

Hinc hinc quām grauis est peccati sarcina, disce,

Cuius non potuit pondera ferre ratis.

AD CANDIDVM, PAROCHVM

VITAE IMPROBÆ.

Factus es o populi pastor mi Candide magni,

Ter tibi, terq; tuo gratulor ergo gregi.

Aut mihi iudicium minuit fauor, aut tuus usquām

Non potuit talēm grex habuisse patrem.

Non tibi uanarum est fastosa scientia rerum,

Quippe nec in populū est utilis illa tuum.

At raræ tibi sunt uirtutes, sic tibi raroſ

Patribus ex priscis credo fuisse pares.

Quid faciant, fugiant ue tui, quo cernere possint.

Vita potest claro pro speculo esse tua.

Tantum opus admonitu est, ut te intueantur, & ut tu

Quæ facis, hæc fugiant, quæ fugis, hæc faciant.

È GRAECO.

Naufragus hac situs est, iacet illa rusticus urna.

Ad styga siue solo par uia, siue salo.

IN POSTHVMVM EPISCOPVM.

Præsules, & merito præfectus Posthume saceris,

Quo magis in toto non erat orbe sacer.

G Gaudeo

Gaudeo tam magnum, tam sanctum gaudeo munus,
 Tandem non temere nunc, uelut ante dari.
 Nempe errare solet temerarius impetus, at te
 Delectum magna sedulitate patet.
 Namque ubi de multis tantummodo sumitur unus,
 Saepe malus casu, pessimus arte uenit.
 At te, de multis legitur si millibus unus,
 Stultior haud possit, deterior uic legi.

DE BOLLANO.

Vrticis lectum Bollano urentibus omnem
 Insternunt socij, quum cubitus erat.
 Se tamen urticis ustum negat, haud negat illas.
 In tenebris nudum se reperisse tamen.
 Vngibus aut, igitur uitata carne necesse est,
 Aut nudis tantum dentibus inciderint.
 Cum tamen in tenebris ill&esus repperit herbas,
 Vrticas qua nam repperit esse nota.

DE VVLPE AEGROTA ET
LEONE APOLOGVS.

Dum iacet angusta uulpes ægrota cauerna,
 Ante fores blando constitit ore Leo.
 Ecquid amica uales? cito me lambente ualebis,
 Nescis in lingua uis mihi quanta mea.
 Lingua tibi medica est, uulpes ait, at nocet illud
 Vicinos quod habet tam bona lingua malos.
 De leone

DE LEONE ET LYSIMACHO.

Dum domitus placido Leo lamberet ore magistrum,
Prouocat exemplo quemlibet ipse suo.

Cumq[ue] diu ex tanta prodiret nemo corona,
Prosilij fortis pectore Lysimachus.

Ipse ait, audebo leoninam tangere linguam,
Sed tam uicinis dentibus haud faciam.

IN FABIANVM ASTROLOGVM.

Vno multa die de rebus fata futuris,
Credula quum de te turba frequenter emat,
Inter multa unum si fors mendacia uerum est,
Illoco uis uatem te Fabiane putem.
At tu de rebus semper mentire futuris.
Si potes hoc uatem te Fabiane putem.

IN IACOBVM REGEM

SCOTORVM.

Dum pius Henricus uictoribus asserit armis
Romano te iterum Gallia pontifici,
Scotorum Iacobus regnum rex ecce Britannum
Occupat, infestis impius agminibus.
Fœdera non illum toties iurata morantur,
Coniugis in fratrem quin ferat arma suæ.
Quin Gallo fidei comitem se adiungeret hosti,
Quin cuperet Petri mergere nauiculam.
Nec mirum est, scelera hæc si uir conceperit, infans
Cæde patris teneras imbuit ante manus.

G 2 Ergo

Ergo uolente Deo, periit cum strage suorum.
Exitus & scelerum qui solet esse, fuit.

IN REGEM SCOTIAE, QVI ARCEM NORHAMAM PRODITAM SIBI TAMEN
OPPVGNAVIT, DISSIMVLANS
PRODITAM ESSE.

Scote quid oppugnas Norhamam uiribus arcem:

Ante tibi falsa proditione datam.

An fraudis pudet: at tam multis, & tot apertis
In uitjjs non est illa pudenda tuis.

Artibus ergo malis capta fuit arce, uoluptas
Magna tibi forsan, sed breuis illa fuit.

Teqz, tuiscz mala (merita sed) morte peremptis,
Arx intra est paucos capta, recepta dies.

Proditor inqz tuo peteret cum praemia regno,
Mors sceleri est merces redditia digna suo.

Proditor ut pereat, pereat cui proditur hostis.
Inuicta in fatis arx habet ista suis.

EPITAPHIVM IACOBI REGIS SCOTORVM.

Scotorum Iacobus princeps, regno hostis amico
Fortis & infelix hac ego condor humo.

Quanta animi fuerat, fidei uis tanta fuisset.

Cætera contigerant non inhonesta mihi.
Sed pudet heu iactare, queri piget, ergo tacebo.
Garrulaqz o utinam fama tacere uelis.

EPIGRAMMATA.

24

Vos tamen o reges moneo, rex nuper & ipse,
Ne sit (ut esse solet) nomen inane fides.

IN MALVM PICTOREM.

Exprimit egregia pictor mirabilis arte,
Dira canis pavitans ut fugit ora lepus.
Intima naturae scrutatus uiscera singit,
In cursu leporem retro metu aspicere.
Tam bene qui leporem fugientem expresserit, opto
Sit lepus, & fugiens ipse retro aspiciat.

IN EVNDEM.

Cum cane sic pictus lepus est, ut dicere nemo
Esset uter ue canis posset, uter ue lepus.
Pictor ubi hoc didicit, quod inertis defuit arti,
Suppleuit miro callidus ingenio.
Res ut aperta foret, longe eis facilliter error,
Subscriptis tantum, est hic canis, iste lepus.

DE TYNDARO.

Non minimo insignem naso dum forte puellam
Basiat, en uoluit Tyndarus esse dicax.
Frustra ait ergo tuis mea profero labra labellis,
Nostra procul nasus distinet ora tuus.
Protinus erubuit, tacitaq[ue] incanduit ira,
Nempe parum salso tacta puella sale,
Nasus ab ore meus tua si tenet oscula, dixit,
Qua nasus non est hac dare parte potes.

G 3 In Brixii

IN BRIXIVM GERMANVM FALSA SCRIBENTEM DE CHORDIGERA, NAVE
GALLORVM, ET HERVEO
EIVS DVCE.

Heruea dum celebras Brixii, tua carmina damnas,

Nam tibi scripta mala est res bene gesta, fide,

Historiam spondes illa Germane poesi,

Quæ modo quum non sit uera, nec historia est,

Aut odio incipient, aut indulgere fauori,

Et quisnam historijs qui modo credit, erit?

Iamq; nec ipse tuus per te laudem Herueus ullam

Sublata rerum possit habere fide.

IN EVNDEM. DE EODEM HERVEO,

ET EADEM NAVE, QVAE IN

PVGNA NAVALI CON

FLAGRAVIT.

Brixius immerita quod sustulit Heruea laude,

Quod merito aduersum fraudat honore ducem,

Quod de Chordigera mendacia mille carina,

Contra quam se se res habuere canat.

Non equidem miror, necq; prauo falsa fauore,

Quod uoluit prudens scribere, credo tamen,

Sed de Chordigera, uatem qui uera doceret,

Qui uit adhuc reducem nemo referre pedem,

Ipse tamen (sciret quo certius omnia) dignus,

Qui media præsens nauem suisset, erat.

Veritas

VERSUS EXCERPTI È CHORDIGERA
BRIXII, AD QVOS ALLVDVNT
QVAEDAM EPIGRAMMA-

TA SEQVENTIA.

Circumeunt unum dextra, leuaçþ Britanni
Heruea, tela uolant brumali grandine plura
In caput unius Heruei, quæ fortiter heros
Excutiens clypeo, contraria in agmina uertit.

POSTEA DE EADEM CHORDIGERA.

Ipse suos Herueus comites hortatur, & instat,
Atq; inter primos audax magno impete in hostes
Inuehitur, ferit hos missio per tempora telo.
Transigit huic gladio costas, huic ilia nudat.
Decutit his caput, impacta per colla bipenni.
His latus, his humeros hasta perstringit acuta.

EPIGRAMMA MORI, ALLVDENS

AD VERSVS SVPERIORES.

Quod ferit hos Herueus missio per tempora telo,
Illaçþ & costas transigit huic gladio.
Decutit his caput impacta per colla bipenni.
His humeros hasta perforat, atq; latus.
Tum clypeo aduersa quod tela uolantia parte
Fortiter excutiens unde uolant, regerit.
Effugit hoc sensum, tot telis pugnet ut unus,
Isçþ cui clypeo est altera onusta manus.

Fortis

Fortis huic pugnæ rerum natura repugnat,

Præteritum quiddam est hac puto parte tibi,

Namque ubi magnanimum produxeris Heruea,telis

Pugnantem pariter quatuor, det clypeo.

Forte tibi exciderat, sed debuit ante moneri

Lector,tunc Herueo quinque fuisse manus.

ALIVD DE EODEM.

Miraris clypeum,gladium,hastam,tela,bipennem,

Herueus quoque gerat belligeretcum modo.

Dexter crudeli manus est armata bipenni,

Instructa est gladio sœua sinistra suo.

Iam telum,telicum uicem quæ præbeat,hastam

Fortiter(impressis dentibus)ore tenet.

At quia tela caput brumali grandine plura

Inuolitant,clypeum collocat in capite.

Duritia capitis draco cesserit,ungue Celeno,

Sic elephas illi dentibus impar erat.

Ergo nouum aduersos monstrum procurrit in hostes.

Terribilis rictu,terribiliscum manu.

HIC PRIMVS VERSVS BRIXII EST, QVO

HERVEA IAM MORITVRVM DE

SE FACIT VATICINANTEM.

Inter Phœbeos non aspernandus alumnos

Heruei magna canit Brixius acta ducis.

Inter Phœbeos non aspernandus alumnos,

Herueum,hostes,socios,concremat atque rates.

Inter

Inter Phœbeos non aspernandus alumnos,
Vnde igitur uates, quæ cecinit, dicit:
Inter Phœbeos non aspernandus alumnos,
Phœbeo reliquum est audiat ex tripode.

IN EVNDEM, VERSVS POËTA/
RVM SVFFVRANTE.

Priscos poetas nemo te colit magis,
Legit ue diligentius.
Nam nemo priscis è poetis omnibus
Est, cuius ipse ex uersibus,
Non hinc & inde flosculos, & gemmulas
Manu capaci legeris.
Vatem redonans tanto honore protinus,
Scriptis tuis ut inseras.
Beasq; uatem, nempe quæ tu congeris,
Suos parentes indicant,
Magiscq; resplendent tua inter carmina,
Quam nocte lucent sydera.
Tantum decus uati inuidere nemini
Soles, amicus omnium,
Ne quis, decus prioris olim sæculi,
Neglectus abs te defleat.
Ergo sacrati ne poetarum modi
Longo situ obsolescerent.
Iniuria tu uindicatos temporis
Nouo nitore percolis.

H Hoest

Hoc est uetustis arte nouitatem dare,
Quare nihil felicius.

Ars o beata, quisquis arte isthac tamen
Vetus nouitati dabit,
Is arte nulla (quamlibet sudet diu)
Nouis uetustatem dabit.

ALLVSIO AD CENOTAPHIUM HERVEI.

Heruea cum Decjs unum conferre duobus,
Aetas te Brixii iudice nostra potest.
Sed tamen hoc distant, illi quod sponte peribant,
Hic perijt, quoniam non potuit fugere.

PHOEBS BRIXIVM ALLOQUITVR.

Vis de grandisono quid sentio scire libello,
Qui arma, necemq; Heruei bellipotentis habet
Ergo sacer Phœbo sacra hæc oracula uates
Accipe Phœbeo redditæ de tripoide.
Vna opere in toto deest syllaba, mille supersunt.
Plenū opus est, nam quid posset abesse minus:
Vna uno hæc legitur, sed non legitur tibi mense,
Et plus quam medium syllaba mensis habet.

Mens.

AD SABINVM, CVI VXOR
ABSENTI CONCEPIT.

Subsidium uitæ, seræ spes una senectæ,
Nata tibi est soboles, curre Sabine domum.

Curre

Curre, salutanda est uxor foecunda, uidenda est.

Chara tibi soboles, curre Sabine domum.

Curre inquam, ac propera, nimiumq; uidebere latus,

Quantumuis properes, curre Sabine domum.

Iam queritur coniunx de te tua, iam tua de te

Conqueritur soboles, curre Sabine domum.

Nunquam ingratus ades, neq; cū soboles tibi nata est,

Sed neq; cum genita est, curre Sabine domum.

Curre, ut adesse, puer sacro dum fonte lauatur,

Nunc saltē possis, curre Sabine domum.

AD CANDIDVM, LAVDANTEM SAN-

CTOS VIROS, CVM IPSE

ESSET MALVS.

Sæpe bonos laudas, imitaris Candide nunquam.

Laudo, inquis, posita Candidus inuidia.

Nam quicunq; bonos imitatur, & æmulus idem est,

O lacte, o niuibus Candide candidior.

QVIS OPTIMVS REIPVB. STATVS.

Quaris uter melius, Rex ne imperet, an tue Senatus.

Neuter (quod sæpe est) si sit uterq; malus.

Sin sit uterq; bonus, numero præstare Senatum,

Inq; bonis multis plus reor esse boni.

Difficile est numerum forsan reperire bonorum,

Sic facile est unum sæpius esse malum.

Et fuerit medius sæpe inter utruncq; Senatus,

Sed tibi uix unquam Rex mediocris erit.

H 2 Consilioq;

Consilio cō malus regitur meliore Senator,
Rex consultores sed regit ipse suos.
Alter ut eligitur populo, sic nascitur alter:
Sors hic cæca regit, certum ibi consilium.
Ille cō se factum populo, populum sibi factum
Scilicet hic ut sint quos regat ipse putat.
Rex est in primo semper blandissimus anno,
Omni anno consul rex erit ergo nouus.
Rex cupidus longo populum corroserit ævo.
Si consul malus est, spes melioris adest.
Nec me nota mouet quæ pastam fabula muscam
Ferre iubet, subeat ne male præsa locum.
Fallitur expleri regem qui credit auarum,
Nunquam hæc non uacuum mittet hirudo art.
At patrum consulta grauis dissensio turbat,
Regi dissentit nemo, malum hoc grauius.
Nam quum de magnis uaria est sententia rebus,
Quæstio sed tamen hæc nascitur unde tibi:
Est ne usquam populus, cui regem siue Senatum
Præficere arbitrio tu potes ipse tuo?
Si potes hoc, regnas, nec iam cui, consule, tradas
Imperium, prior est quæstio, an expedit.

DE FUSCO POTORE.

Potando medicus perituros dixit ocellos
Fusco, qui cum se consuluisse ait,

Perdere

Perdere dulcius est potando, quam ut mea seruem
Erodenda pigris lumina uermiculis.

AD AMICVM.

Litera nostra tuis quantum mihi colligo scriptis,
Sera tibi ueniet, nec tibi sera tamen.
Nec bello ueniunt intempestiva peracto,
Quæ bello poterant tela iuuare nihil.

DE REGE ET RVSTICO.

Rusticus in sylvis nutritus uenit in urbem.
Rusticior Fauno, rusticior Satyro.
En populus plena stetit hinc, stetit inde platea,
Vnaq; uox tota, Rex uenit, urbe fuit.
Rusticus insolita uocis nouitate mouetur,
Quidnam ita respectet turba, uidere cupit.
Rex subito inuehitur, celebri præeunte caterua,
Aureus excuso conspiciendus equo.
Tum uero ingeminant, uiuat rex, undiq; regem
Attonito populus suspicit ore suum.
Rusticus, o ubi rex? ubi rex est? clamat, at unus,
Ille, ait, est illo qui sedet altus equo.
Hiccine rex? puto me derides, rusticus inquit.
Ille mihi picta ueste uidetur homo.

IN EPISCOPVM ILLITERATVM, DE
QVO ANTE EPIGRAMMA EST
SVB NOMINE POSTHUMI.

Magne pater clamas, occidit litera, in ore
H, Hoc unum

Hoc unum, occidit littera semper habes,
 Cauisti bene tu, ne te ulla occidere possit
 Littera, non ulla est littera nota tibi.
 Nec frustra metuis ne occidat littera, scis non
 Viuificet qui te spiritus esse tibi.

DE SACERDOTE RIDICULE ADMONEN-
 TE POPVLVM DE IEIVNIO, CVM
 DIES IAM PRAETERISSET.

Admonuit populum noster cum forte sacerdos,
 Proxima quos fastos afferat hebdomada,
 Martyris Andreæ magnum & memorabile festū est,
 Scitis, ait, charus quām fuit ille deo,
 Squalida lasciuam macerent ieunia carnem.

Hoc suetum est, sancti hoc instituere patres,
 Præmoneo ergo omneis, in martyris huius honorem,
 Quod ieunari debuit, inquit, heri.

DE QVODAM MALE CANTANTE,

ET BENE LEGENTE.

Tam male cantasti, possis ut episcopus esse.

Tam bene legisti, ut non tamen esse queas.
 Non satis esse puto, si quis uitabit utrumquis,
 Sed fieri si uis præsul, utruncq; caue.

AD SABINVM.

Quos ante coniunx quattuor
 Natos Sabine protulit
 Multum ecce dissimiles tibi,

Tuos

Tuos nec ipse deputas.
Sed quem tibi puellulum
Enixa iam nuperrime est,
Solum tibi simillimum
Pro quatuor complecteris.
Adulterinos quatuor
Vocas, repellis, abdicas.
Hunc unicum ceu γνήσιον,
Qui sit tibi hæres, destinas.
Hunc ergo in ulnis gestiens,
Exosculandum ab omnibus
Ut filium fert simia,
Totam per urbem baiulas.
Atqui graues tradunt Sophi,
Quibus laborēs, studiumēs id est,
Secreta quicquid efficit
Natura perscrutarier.
Ergo graues tradunt Sophi,
Quodcunq; matres interim
Imaginantur fortiter,
Dum liberis datur opera,
Eius latenter & notas,
Certas & indelebileis,
Modoq; inexplicabili
In semen ipsum congeri.
Quibus receptis intime,

Simulē

Simulq; concrecentibus
A mente matris insitam
Natus refert imaginem.
Quum tot abesses milibus,
Dum gignit uxor quatuor,
Quod esset admodum tui
Secura, dissimiles parit.
Sed unus omnium hic puer
Tui refert imaginem,
Quod mater, hunc dum concipit,
Sollicita de te plurimum,
Te tota cogitauerat,
Dum pertimescit anxia,
Ne tu Sabine incommodus
Velutq; Lopus in fabulam
Superuenires interim.

DE PRINCIPE ET RVSTICO
SELANDO, RIDICVLVM.

Quum spectaret aquas princeps, in ponte resedit,
Primoresq; suos ante stetere pedes,
Rusticus adsedit, modico tamen interuallo,
Ciuilemq; dato se putat esse loco.
Suscitat hunc quidam, & cum principe, dixit, eodem
Ponte sedere audes rustice? non ne pudet?
Ille refert, scelus est in eodem ponte sedere?
Quid si pons longus millia dena foret?

De Aulico

DE AVLICO RIDICVLVM.

Quum descendit equo de circumstantibus uni
 Aulicus hunc teneas quisquis es inquit equum.
 Ille ut erat pauidus dixit, domine ergo ferocem,
 Hunc rogo qui teneat sufficit unus equum?
 Vnus ait potis est retinere, subintulit ille.
 Si potis est unus, tu potes ipse tuum.

IN MILITEM FVGACEM
ET ANVLATVM.

Aureus iste manus miles cur annulus ornat
 Iure tuos ornet qui meliore pedes?
 Vtilior nuper, meliorq; in Marte feroci
 Planta tibi palmis una duabus erat.

IN BRIXIVM POETAM.

Brixii tale tuo natum est ænigma libello
 A Sphinge opponi possit ut Oedipodi.
 Cordigera est tibi tota frequens, tibi no tamē usq; est.
 Cordigeræ in toto syllaba prima libro. Cor.

IN TVSCVM POTOREM.

Perdis ait Tusco Medicus tua lumina uino,
 Consultat secum quid uelit ergo sequi.
 Sydera, terra, fretumq; solent quecunq; uideri,
 Omnia sunt inquit uisa reuisa mihi.
 Multa mihi sed uina tamen gustanda supersunt,
 Multa refert annus quum noua musta nouus.

I Iam

Iam certus, firmusq; ualebitis inquit ocelli
Nempe satis uidi, non satis usq; bibi.

IN ARNUM PERIVRVM.

Iurasti satis Arne diu, tandem obtinuisti,
Iurare ut posthac iam tibi non sit opus.
Coepit ubiq; tuo uir iuratissime uerbo
Quam iuramento non minor esse fides.

IN EVNDEM.

Te semper iuras, & cunctis Arne minaris,
Vis scire utilitas quae uenit inde tibi.
Sic iuras, ut nemo tibi iam deniq; credat,
Sic minitaris, ut has nemo minas metuat.

IN EVNDEM.

Arno nemo magis pedibus ualet usq; sed olim
Frigore contractas perdidit ille manus.
Optat bella tamen, cui pes citus, utraq; manca est
Cui manus, in bello, scis puto quid faciet.
At cui lingua procax, manus est ignaua, procax est
Huic non ignaua lingua secunda manu.

DE MARVLO.

Admonuit Medicus lippum Theodore Marullum
Ne uinum (cæcus ni uelit esse) bibat.
Pareat ut medico (quancq; ægre) abstemius esse
Ecce duos totos sustinet usq; dies.
Post, sitit assueti reuocatus imagine uini,
Iam q; foras Medico uera minante ruit.

Ventum

Ventum erat ad uinum, quum sic sua lumina mœstus

Affatur, posito iam peritura mero.

Huc iter est, huc me fidi duxistis ocelli.

Hunc bibite, & dulces ambo ualete duces.

Gustus, odorq; manent, miratur abire colorem,

In nigras subeunt lumina dum tenebras.

Hoc tamen aduersum lenit solamine casum,

Dote meri minima quod cariturus erat.

IN RISCVM EQVITEM

IMBELLEM.

Riscus eques prudens longoq; peritus ab usu

Dissimiles, causa non sine, pascit equos.

Nanq; alit ille duos, uolucrem præuerterit alter,

Alter sed pigro, pigrior est Asino,

Hic ergo non festinantem ad prælia defert,

Ille prius tuba q; clanxerit, inde refert.

IN GELLIAM.

Mentitur qui te dicit mea Gellia fuscam

Iudice me non es Gellia fusca, nigra es.

IA EANDEM.

Candida sum dicis, fateor, sed candida quum sis,

Cur tibi candorem hunc obtegit atra cutis?

IN EVPARYPHVM VESTE, OPPIGNE/

RATO FUNDI, EMPTA.

Non miror sudare tuæ te pondere uestis,

I 2 Quatuor

Quatuor hæc terræ iugera uestis habet,
 Quantum uiuenti tibi terræ ingesseris usq;
 Tam magnum tumulū, nec tumulatus habet,

IN GAREMANVM VENDI,
 TIS AGRIS PAV-
 PEREM.

En patrios nuper Garemanus uendidit agros,
 Nunc subito fama uiuere fertur inops.
 Non illi ingenium, non illi industria defit,
 Verum inimica uiro fata, nocere puto.
 Nam putres fuluo glebas mutauerat auro
 Callidus, & nunq; rem tamen ille facit.

AD SABINV M.

Interiere duæ, coniunx tibi tertia nupsit
 Nec tibi fida tamen de tribus ulla fuit.
 Non tantum ergo tuas, sed damnas improbe totum
 Fœmineum irata mente Sabine genus.
 Si tamen hanc æqua rem uis expendere lance,
 Fies erga ipſas mitior ipſe tuas.
 Nam tres quum fuerint ijsdem tibi moribus omnes,
 Astra hæc nascenti fata dedere tibi.
 Si genesis tua te semper iubet esse cucullum
 Scilicet expectas uxor ut astra regat:
 Casta futura alijs fuerat, quod adultera tecum est
 Hoc merito fatis imputat illa tuis.

In nauſa

EPIR GAMMATA.
IN NAVFRAGVM MORSVM A
VIPERA IN LITTORE,

257

E GRAECO.

Aequoris insanas euasit naufragus undas,
Tristius Afra salo præbet harena solum.
Dum iacet ecce graui pressus prope littora somno,
Nudus, & infesto fessus abusq; freto,
Vipera trux perimit, frustra fugis æquora frustra,
Heu miser, in terris debita fata tibi.

DE CHIRVRGO ET ANV.

Vnxit anus ægros uelans chirurgus ocellos
Vtile persuadens hoc fore quinq; dies.
Interea mappas, pelues, mortaria, discos,
Quicquid onus tutum non facit, inde rapit.
Quum sanata oculos circumtulit illa reuinctos
Instrumenta suæ sentit abesse domus.
Mercedem ergo exacta, tua contingeret inquit
Vberior pactum est, ut mihi uisus ope.
At uideo nunc q; ante minus, quorum usus in æde est,
Vidi multa prius, nunc uideo inde nihil.

AD QVENDAM.

Quam tibi mens leuis est, tibi si pes tam leuis esset,
In medio leporem posses præuertere campo.

DE HERODE ET HERODIADE.

Coram Herode Herodiadis dum filia saltat
Dum quo debuerat displicuisse placet,

I , Ebrius

Ebrius affectu rex coniugis, ebrius illo

Fortunæ luxu, prætereā q̄ mero.

Opta ait o uirgo, dabitur, iurauimus, huius

Dimidium regni poscere si libeat.

Impia suggestu sceleratæ filia matris,

Inquit, Baptistæ da precor ergo caput.

Dona petis uirgo (si saltatricula uirgo est)

Quæ uix sustineas cernere dona petis.

O funesta parens, o natæ dira nouerca,

Saltare, atq; homines quam iugulare, doces,

Rex dolet, & tristis concedit. nempe coactus

Iurisiurandi relligione sui.

O regem fidum, sed tunc tantummodo fidum,

Maius perfidia est quum scelus, ipsa fides.

AD QVENDAM EBRIOSVM.

Tecum in colloquium quod non properantius iui

Segniciem incusas, conquereriſq; meam,

Confiteor uere, tibi non in tempore ueni,

Serior, aut citior debuit hora legi.

Aut utinam eiusdem uenissem mane diei,

Aut tibi uenissem mane sequente die.

Nunc res luce nimis tractari cœpit adulta,

Quando tua factum est ebrietate nihil.

IN PICTVRAM HERODIANAE MENSAE.

Sanguine funesta est Herodis mensa uirili,

Sanguine funesta est, mensa q; Flamminij.

Tam

EPIGRAMMATA.

259

Tam similes cædes, similes fecere puellæ,
Illam saltatrix obtinet, hanc meretrix.
Id tamen intererat, meretrici uita nocentis,
At saltatrici penditur innocui.

IN EANDEM PICTVRAM.

Ora uiri foedo sancti fluitantia tabo,
Decussu mīq; gerit regia mensa caput.
Corpora sic regi rex Atreus ambo Thyesti
Natorum apposuit frater edenda patri:
Sic regi Odrysio natum regina peremptum
Fida soror, genitrix perfida ponit Itim,
Talia regales ornant bellaria mensas.
Crede mihi non est pauperis iste cibus.

IN VEHEMENTER NASV-

TVM È GRAECO.

Situus ad solem statuatur nasus, hiante
Ore, bene ostendas dentibus hora quota est.

IN FVCATVM È GRAECO.

Quor emitur fucus, coma, dens, mel, ceráq;, posset
Quum persona tibi tota minoris emi:

IN HISTRIONEM È GRAECO.

Catera ad historiam, quiddā tamen, id quoq; magnū
Iam tibi saltatum contra erat historiam.
Dum Nioben ageres, stabas tanq; lapis esles,
Quum fieres Canapeus ecce repente cadis.

At

At Canacem gladio referens, quum uiuus abiisti,
Hoc tibi saltatum contra erat historiam.

IN HISTRIONEM È GRAECO.

Saltauit Nioben, saltauit Daphnida Memphis
Ligneus ut Daphnen, saxeus ut Nioben.

IN EBRIOS È GRAECO.

Vespere quū bibimus homines sumus, atq; benigni.
Mane homini siccus trux fera surgit homo.

IN ANDREAM IN MARE
VOMENTEM.

Gratus es Andrea, dignusq; cui bene fiat.
Nam pisces toties qui te pauere, repascis.

DE EODEM.

Aequoris edisti pisces, irascitur æquor.
Eçp tuo fœtus exigit ore suos.

IN PVELLAM DIVARICATIS TI/
BIIS EQ VITANTEM.

Ergo puella uiri quis te negat esse capacem,
Quum tua tam magnum círcudat crura caballum?

AD GALLVM SVBLEGENTEM VE
TERVM CARMINA.

Vatibus idem animusç, & uere spiritus idem,
Qui fuit antiquis est modo Galle tibi.
Carmina nanç eadem, uersusç frequenter eosdem
Quos fecere illi, tu quoç Galle facis.

De histrione

O.R.I
tiimus alii
historiam
RAECC.
a Memphis
ur Nobes
ECO
nus, atq; h
surgit hom
MARE
ne fix;
pasca,
uo.

ICATIS
TEM,
capacem
it cura cab
GENTEN
NA,
pinitus idem
Galle nob
requentia
ille faci
Dile
1824

EPIGRAMMATA.

261

IN SCVRRAM PAVPEREM.

Scurra ubi iam fures totam sibi nocte uideret
Scrutanteis magna sedulitate domum,
Risit, & o media quid uos hic nocte uidetis
Miror ait, media nil ego cerno die.

DE SOLLICITA POTENTVM VITA.

Semper habet miseras immenisa potentia curas,
Anxia perpetuis sollicitudinibus.
Non prodit, multis nisi circumseptus ab armis,
Non nisi gustato uescitur ante cibo.

Tutamenta quidem sunt hæc, tamen hæc male tutum
Illum, aliter tutus qui nequit esse, docent.
Nempe satellitum, metuendos admonet enses,
Toxica prægustans esse timenda docet.

Ergo timore locus quisnam uacat hic, ubi gignunt,
Hæc eadem pellunt, quæ metuenda, metum.

IN PRIVIGNVM COLLAPSA NOVERCAE
STATVA OPPRESSVM. È GRAECO.

Flore nouercalem cingis priuigne columnam,
Morte ratus mores interiisse malos.
Te tamen illa premit subito inclinata, nouerçæ
Si priuigne sapis, ipsa sepulchra fuge.

AD QVENDAM POËTAM

EXTEMPORALEM.

Hos quid te scripsisse mones ex tempore uersus?
Nam liber hoc loquitur, te reticente, tuus.

K In nouercas.

IN NOVERCAS. È GRAECO.

Priuigno uel amans infortunata nouerca est.

Hippolyto grauis, hoc Phædra docere potest.

IN QVENDAM QVI DICEBAT

CARMINIBVS SVIS NON

DEFVTVRVM GE-

NIVM.

Hoc habet Hispani festiuum epigramma poëta.

Victurus Genium debet habere liber.

Dum legis hunc uersum, iam tu quoqz scribere uersus

Tota mente paras, sed sine mente tamen.

Quæ ue canas, qualz ue modo contemnis, ea est spesVictura haec Genio qualiacunqz suo.Namqz tuis Genium uitam geniose Camcenis,

Non dubitas aliquem mox alicunde fore.

Tutamen (& cariturus erit) tuus hic liber, opta

Ut careat Genio, qui caret ingenio.

Cui Genius uitam producat si quis, erit quis

Ex Genijs, adsunt qui tibi mille, malis.

Sed neqz sic uiuet, uati si credis eidem,

Nam non uiuere, sed uita ualere bene est.

Quod si uita libri est iugi languescere probro.

Detur & æterna uiuere morte tibi.

DE CUPIDITATE REGNANDI.

Regibus è multis regnum cui sufficit unum,

Vix Rex unus erit, si tamen unus erit.

Regibus

Regibus è multis regnum bene qui regat unum.
Vix tamen unus erit, si tamen unus erit.

DE DEDITIONE NERVIAE HENRI/CO VIII ANGLIAE REGI.

Belliger inuitam domuit te Nervia Cæsar,
Non tamen extremis absq; utriusq; malis.
Te capit Henricus, capit & sine sanguine, princeps
Magno tam maior Cæsare quam melior.
Sensit honorificum sibi Rex cœpisse, tibiq;
Vtile sensisti non minus ipsa capi.

DE FABVLLA ET ATTALO.

Fabulla nuper nescio quid Attalo
Irata, & illum commouere gestiens,
Ostenderec; quam prorsus hunc nihil putet.
Iurauit illi, si sibi centum forent
Membra, mulier quibus fit, è centum tamen
Præstare dignaretur haud unum Attalo.
Non inquit ille: quæ, malum, est isthæc noua
Frugalitas tibi: quæ ue parsimonia:
Certe solebas esse liberalior.
Vnum ne de centum grauareris modo
Auara commodare: at aliquando unicum
Tantum quum haberes, unicum tamen, uiris
Centum solebas dare benigna centies.
Hei metuo ne quid ista portendat tibi
Monstrosa tandem parcitas, magni mali.

K 2 De febri

DE FEBRICITANTE ET
MEDICO BIBACI.

Febre laboraret mihi quum puer Hemitritæ,
 Forte ibi Sauromatæ posco medentis opem.
 Sensit ut ad moto salientem pollice uenam,
 Fortis, ait, calor est, sed calor ille cadet.
 Flagitat ergo cyphum, fundumq; exhaerit ad imum,
 Quantum nec Bitias ebibiturus erat.
 Haurit, ad æqualeis ægrotum prouocat haustus,
 Et facere hoc temere ne uideatur, ait,
 Aestuat hic ualde, ualde bibat ergo necesse est,
 Non paruo obruitur magna liquore pyra.

DE HESPERO CONFIDENTE.

Ex more sacro dum sacerdoti Hesperus
 Commissa fassus expiaret crimina,
 Explorat huius ille conscientiam,
 Et cautus omne examinat scelerum genus,
 Interq; multa querit, an unquam malos
 Ritu prophano crediderat in dæmonas.
 Vah ego ne credam in dæmones, inquit, pater!
 Multo labore uix adhuc credo in Deum.

DE OCCASIONE DEO. E GRAECO.
 Vnde erat hic plastes? Sicyonius. at quis erat, dic.

Lycippus. tu quis? tempus ego omne domans.
 Cur summis instas digitis? roto semper. at alas
 Cur pedibus gestas? ut leuis aura feror.

hd. 2. C. 4. 1.

At dextera

At dextram cur armat acuta nouacula: signum est,
 Quod conferri acies non potis ulla mihi est.
 Cur coma fronte iacet: quod qui me prendere captat.
 Praueniat. caluum est cur tibi retro caput:
 Quod postq; leuibus præceps effugero pennis,
 Nil aget à tergo qui reuocare uolet.
 Vnde igitur posses documentum sumere, talem
 Artificis posuit me tibi docta manus.

DE PHYLLIDE ET PRISCO IM/
 PARITER AMANTIBVS.

Clam Phyllis cupido bene nubet candida Prisco,
 Quam bene spumanti uitrea lympha mero.
 Phyllida Priscus amat calido feruentius igne,
 Frigidius gelida Priscus amatur aqua.
 Iungetur tuto, nam si simul ardeat illa,
 Sustineat flamas quæ domus una duas:

DE NVMMIS ANTIQVIS APVD
 HIERONYMV M EVSLIDIA-
 NVM SERVATIS.

Roma suis olim ducibus quam debuit, illi
 Tam debent omnes Buslidiane tibi.
 Roma suis ducibus seruata est, ipse reseruas
 Romanos Roma præmoriente duces.
 Nam quæ Cæsareos antiqua nomismata uultus,
 Aut referunt claros tuin ue prius ue uiros,

K , Haec

Hæc tu sæclorum studio quæsita priorum
 Congeris, & solas has tibi ducis opes.
 Cunq[ue] triumphaleis densus cinis occulat arcus,
 Ipse triumphantum nomen, & ora tenes.
 Nec iam Pyramides procerum monumenta suorum
 Tam sunt, quam pyxis Buslidiane tua.

AD EVNDEM.

Ecquid adhuc placidam mi Buslidiane Camœnam
 Tua coërces capsula?
 In tenebras abdis cur dignam luce, quid illis?
 Quid inuides mortalibus?
 Musæ fama tuæ toto debetur ab orbe.
 Quid huic repellis gloriam?
 Gratus ab hac fructus toti debetur & orbi
 Quid unus obstas omnibus?
 An tibi casta procul cœtu cohibenda uirili
 Cohors uidetur uirginum?
 Sunt hæc uirginibus fateor metuenda, sed illis
 Deuirginari quæ queunt.
 Aede tuam intrepidus, pudor est infelix illi.
 Nec ille rudis, aut rusticus.
 Ut tua non ipsi cessura est uirgo Dianæ
 Pudore grata lacteo,
 Sic tua non ipsi cessura est uirgo Mineruæ
 Sensu, lepore, gratia.

Ad Bullidianū

AD BVSLIDIANVM DE AEDIBVS

MAGNIFICIS MECHLINIAE.

Culta modo fixis dum contemplabar ocellis,
Ornamenta tuæ Buslidiane domus,
Obstupui quonam exoratis carmine fatis
Tot rursus ueteres nactus es artifices?
Nam reor illustreis uafris ambagibus ædes,
Non nisi Dædaleas ædificasse manus.
Quod pictum est illic pinxitse uidetur Apelles,
Quod sculptum credas esse Myronis opus.
Plastica quam uideo Lysippi suspicor artem,
Quum statuas, doctum cogito Praxitelem,
Disticha, quod cęp notant opus, at quæ disticha uellet,
Si non composuit, composuisse Maro.
Organa tam uarias modulis imitantia uoces,
Sola tamen ueteres uel potuisse negem.
Ergo domus tota est, uel sacerdoti nobile prisca,
Aut quod prisca nouum sæcula uincat opus.
At domus hæc noua nunc, tarde, sero cęp senescat
Tunc uideat dominum, nec tamen usq; senem.

DE PHILOMENO ET AGNA, CON
IVGATIS MALA FIDE.

En redeunt nostro Veneris miracula sædo
Qualia nec prisca tempore facta reor.
Flos iuuenes inter Philomenus, & Agna puellas.
Iunguntur Paphia rite fauore Deæ.

K 4 Ille

Ille sed heu nimium laudata uoce superbit,

Illa tumet placidi laudibus ingenij.

Ergo coniugium uotis tam saepe petitum

Non Veneri acceptum, sed retulere sibi.

Ingratis adimit formam Dea, neue coirent

Mutati, dispar indit utriq; genus.

Mox Philomenus enim quavis aestate canentem

In cuculum, in eþ auidam uertitur agna lupam.

MEDICINAE AD TOLLENDOS FOETORES

ANHELITVS PROVENIENTES

A CIBIS QVIBVS DAM.

Sectile ne tetros porrum tibi spiret odores,

Protinus a porro fac mihi cepe uores.

Denuo foetorem si uis depellere cepe,

Hoc facile efficient allia mansa tibi.

Spiritus at si post etiam grauis allia restat,

Aut nihil, aut tantum tollere merda potest.

AD LECTOREM DE NOVO TESTAMENTO VERSO AB ERASMO
ROTERODAMO.

Sanctum opus, & docti labor immortalis ERASMI

Prodit, & o populis commoda quanta uehit:

Lex noua nam ueteri primum est interprete lafa

Scribentum uaria post uitiata manu.

Sustulerat forsan mendas Hieronymus olim,

Sed periere pigro tam bona scripta situ.

Tota

Tota igitur demptis uersa est iam denuo mendis,
Atq; noua CHRISTI lex noua, luce nitet.
Nec tamen ambitiose singula uerba notauit,
Sanctum habuit quicquid uel mediocre fuit.
Quo sit ut haec celeri si quis præteruolet ala,
Huic nihil hic magni forte putetur agi.
Idem si presso relegat uestigia gressu,
Censebit maius commodius ue nihil.

AD REVERENDISSIMVM &c. THOMAM
CARDINALEM ET ARCHIEPISCO
PVM EBORACENSEM, IN LI-
BRVM NOVI TESTAMEN
TI, EI AB ERAS-
MO DATVM.

Vnice doctorum pater, ac patrone uirorum,
Pieridum pendet cuius ab ore chorus,
Cui populus quantum defert ac cedit honore,
Virtutes infra est tantum honor ipse tuas.
Ab liber iste tuo longe tibi uenit ERASMO.
Hunc precor hoc animo quo dedit ipse, cape.
Nec dubito, capies operi nam iure fauorem
Autor, & autori conciliabit opus.
Ille tui cultor semper fuit, est opus ipsum
Lex CHRISTI, studium quæ fuit usq; tuum.
Illa paratur ab hac prudens tibi lege facultas,
Qua Momo coram reddere iura potes.

Namq;

Namq; ita perplexas populo mirante querelas

Discutis, ut uictus non queat ipse queri.

Non humana tibi facit hoc sollertia, sed lex

CHRISTI, iudicijs unica norma tuis.

Ergo opus hoc placido Præsul dignissime uultu

Excipe, & auctori (quod facis) usq; faue.

AD REVERENDISSIMVM &c. ARCHI-

EPISCOPVM CANTVARIENSEM.

Quod bene sunt collata tuo pie præsul ERASMO

Tanta tua toties munera prompta manu,

Quam non ducat iners, quæ tu facis ocia, monstrant

Multa, sed in primis indicat istud opus.

Aediderit quamvis numerosa uolumina, fructu

Non sine, uincit opus cuncta priora nouum.

Cunctorum utilitas, sed honor te est inter, & illum.

Præstítit ille operam, tu bone præsul opem.

At partem ille suam toto tibi pectore cedit,

Quicquid agit, meritis imputat omne tuis.

Hunc petit ille sui fructum pater alme laboris,

Charus ut hoc tu sis omnibus, ille tibi.

EPITAPHIVM IN SEPVLCHRO IOHANNÆ

OLIM VXORIS MORI, DESTINANTIS

IDEM SEPVLCHRVM ET SIBI ET

ALICIAE POSTERIORI VXORI.

Chara Thomæ iacet hoc Iohanna uxorcula Mori,

Qui tumulum Aliciae hunc destino, quiq; mihi

Vna

Vna mihi dedit hoc coniuncta uirentibus annis,

Me uocet ut puer, & trina puella patrem.

Altera priuignis (quæ gloria rara nouercæ est)

Tam pia, quæ gnatis uix fuit ulla suis.

Altera sic mecum uixit, sic altera uiuit,

Charior incertum est, hæc sit, an hæc fuerit.

O simul o iuncti poteramus uiuere nos tres

Quæ bene, si satum religioç sinant.

At societ tumulus, societ nos obsecro cælum;

Sic mors, non potuit quod dare uita, dabit.

EPIGRAMMATVM CLARISSIMI DISERTIS.

SIMI' QVE VIRI THOMAE MORI,

CIVIS ET VICECOMITIS

LONDINENSIS, FINIS.

BASILEAE, APVD IOANNEM FRO

BENIVM, MENSE MARTIO.

AN. M. D. XVIII.

172. — P R I O R A T A

— M A Y 1 5 6 0
— 1560 —



E P I G R

Vna mihi dedit hoc con
Me uocet ut puer, &
Altera priuignis (quæ glo
Tam pia, quam grata
Altera sic mecum uixit sic
Charior incertum est
O simul o iuncti poterant
Quam bene, si satuis
At societ tumulus, societ u
Sic mors, non potuit

EPIGRAMMATVM C
SIMI' QVE VIRI
CIVIS ET
LONDINE

BASILEAE, APV
BENIVM, ME
AN. M.

